

東
華
續
錄

東華續錄

光緒四十二

臣朱壽朋敬編

臣潘鴻鼎恭校

秋七月辛酉朔時享 太廟遣降勅恭代行禮○壬戌諭前因江西候補通判趙清韶呈遞條陳繕錄寄信諭旨並有捏造情事當經降旨先行革職交刑部嚴訊茲據該部訊明具奏此案已革江西候補通判趙清韶條陳開礦摺內所錄諭旨經山東巡撫查獲傳鈔人犯錄供咨送刑部復經該部確切研訊實係轉相傳鈔趙清韶並不知有捏造情節惟未辨真偽輒行冒昧呈奏實屬謬妄趙清韶著照所擬從重發往軍臺効力贖罪不准援減○飭禮部嚴定八旗章試章程○申禁廣東開姓賭博○予剿擒陣亡花翎都司劉國英守備銜儘先千總宋永壽從優議卹○癸亥諭軍機大臣等御史李郁華奏江南狼山鴉片嘴及焦山等處所築礮臺未能得力惟圖山關及焦山近江地段土礮臺十數座可安礮位百數十尊左右推移三面可擊較為靈便聞所費不過三千金而狼山等處礮臺動用數百萬兩雖保非經手各員侵挪浪擲任意開銷請飭查核等語近來江海防務緊要江南修築礮臺所費不貲若如所奏均不得力徒糜餉項且有侵挪情弊緩急如何可恃著劉坤一彭玉麟詳細查復據實具奏○予安徽桐城縣節婦姚

趙氏等旌表○甲子諭 孝貞顯皇后梓宮奏移 曹祥峪 定東陵永遠奉安著欽天監於八九月間

敬謹選擇吉期具奏○諭前鋒統領熙拉布等奏查明失察盜甲被竊之值班章京請交部嚴議一摺所
有失察東華門樓偷竊盜甲之鑲黃旗護軍參領雙喜副護軍參領扎倫泰正白旗委護軍參領全明均
著交部嚴加議處嗣後各該處值班官兵務當認真巡查倘敢稍涉疎懈定當從嚴懲辦決不寬貸○張
樹聲等奏地方之治亂上繫乎政教下繫乎風俗鄉士大夫之所行所爲固風俗所視爲向背也粵東嶺
海奧區人物蕃庶往往尙功利而習詭譎臣等懷事賢友仁之心求正誼明道之士凡致身通顯有聞於
時者不敢妄爲衡量至在下士之列而有卓絕之行耳目所及得兩君子焉前署山西襄陵縣知縣朱次
琦南海縣進士諸明正學身體力行任襄陵時卓卓多異政其興修平河水利得水田三萬畝縣民至今
賴之臣樹聲前在山西卽聞彼都人士聲祝勿衰及來粵經年益稔其守先待後門牆高峻足不入城市
比閭族黨德善其所居九江一鄉無拖欠錢糧者尤通省所罕也國子監學錄銜陳澧番禺縣舉人持
躬謹嚴識量闊達通經學道粹然儒者所著聲律通考漢書地理志水道圖說原任大學士曾國藩服其
精博其餘著述尙多亦皆能發明義理篤實純正士人出其門下者率知束身修行成就最衆此兩人者
皆以絕世之才治經生之業今皆年逾七十矣祥麟鳳凰潛德勿曜臣等特罪職圻而使姓名不達於

天聽亦尸素之咎也伏維周禮太宰以九兩繫邦國三曰師四曰儒而於司徒本俗復聯以師儒治本所關蓋非淺鮮況粵中習尚流佚如朱次琦陳澧兩人耆年碩德實副周官師儒之選松柏後彫於歲寒雞鳴不已於風雨尤宜表而出之風厲一世上諭張樹聲裕寬奏敬舉篤行紳士請量予褒異等語據稱廣東在籍紳士前署山西襄陵縣知縣朱次琦請明正學身體力行比閭族黨肅德善良國子監學錄銜舉人陳澧持躬謹嚴通經學道士人出其門者率知束身修行成就最眾各情該員等學行純篤足以矜式士民洵屬可嘉朱次琦陳澧均著加恩賞給五品卿銜以爲積學敦品者勸○銘安等奏吉林自伊通之南本係闢場之地再其南則爲奉天闢場奉天闢場之南始爲廢地山獸滋生之所山獸出覓水草北來最多故於該處設立闢場自奉天請放闢場荒地後人煙日稠山獸遠避斷不能越境再至吉林之闢場每逢捕打貢鮮竟至一無所獲聞其地多沃壤日露煤鐵之苗故臣於飭派差委知府李金鋪協領全福興奏省委員會勘界址之時會同臣吳大澂札令該府等順赴該處勘明有無沃壤可以招佃有無煤及鉛鐵可資開採據實稟復茲據李金鋪等稟稱查吉省南荒地來自蘇密西至青頂子其間高原平壤錯立山中者計有二十七處共計地畝約有十餘萬晌均堪墾種如與由奉劃回吉林之地一律招墾實於民業餉源均有裨益至煤與鉛鐵各礦查礦洞山等七處有大大可開採者繪圖開摺稟請核辦前來臣

等伏念園場原爲採捕牲畜而設現在山獸不至若再如前封禁不但有名無實抑且有弊無利蓋由劃回之荒地居民墾種已久一旦驅逐概令遷移必致流離失所若分別或放或封是亦徒滋居民偷種之弊合無仰懇 天恩俯念吉省南荒園場無可採捕准其援照奉省請放園場一律招佃認領墾種並興辦礦務以期安民業而裕餉源從之○乙丑諭兵部奏請飭拿書吏歸案審辦一摺吏部書吏朱慶雲等冒領卹賞銀兩案內兵部書吏諸殿臣畏罪潛逃著步軍統領衙門順天府五城御史一體嚴拿務獲交刑部歸案訊辦○丁卯 上詣 觀德殿 孝貞顯皇后几筵前行禮○劉長佑奏雲南順寧府屬耿馬土司有族人罕榮高罕恩慶與土司罕榮陞尋仇爭鬪當飭該文武妥速彈壓解散於六年八月間附奏在案續據稟報罕榮高罕恩慶各帶土練夷匪分占耿馬及猛撒猛永各土城并稱有順雲協差弁黃福源從中唆助等情臣等恐該土族勾通外夷侵越內地一面飭催該府協督兵團於該府屬界上嚴爲備禦一面飭催候補副將陳德厚管帶新副右營練軍於該土族界上相機捕防並飛飭署順雲協副將李榮春務將差弁黃福源上緊拿拏去後旋據李榮春稟比聞該土族等分據耿馬各城並據土司稟稱黃福源同在城中隨即帶領親兵由營起程經過萬年莊復約同新副右營總哨鄧沛酌帶練軍馳往猛永設法解散維時該土司已逃往猛止該土族與黃福源亦均不在猛永該副將當俾城內土民面爲開

諭分別解散安撫取結回營仍遵札派弁緝拏黃福源務獲解究等情並由提督進西道轉報前來而順甯府知府周範因土司前稟及各探報有該協差弁在內遂以李榮春不卽會督兵練聲罪進剿率帶親兵赴永解散又未將罕榮高罕恩慶及黃福源捕獲一人自係知情縱容稟請究辦正在批飭查究間復據李榮春亦以該府查驗土司號紙該土司苛派土民差費致生事端與之互訐等以該府協各懷意見恐誤事機且查黃福源實係該協差弁該府原稟不爲無因當將李榮春撤任摘頂檄委進西道熊昭鏡前往查辦時黃福源已由李榮春派弁拏解到府罕榮高亦散黨退回猛角祇罕恩慶尙據耿馬未退因卽委員督同官兵土練悉力圍撲斃匪多名當將耿城收復罕恩慶乘間奔逃熊昭鏡恐追捕過急非避死緬國卽求援野夷一時斷難得手但飭在防官兵督同土司設法捕拏並傳諭罕榮高捆綁罕恩慶藉以自贖隨卽傳訊李榮春據供市到署任未查得案會據罕恩慶稟轉懇各上憲改獎耿馬土職並據罕榮陞稟轉飭罕恩慶速回猛水土城都司黃福源久在緬甯前任曾委查探馬二此次加札仍赴各猛查探屬實訊據黃福源供認奉札往查各情無異其初由省城到順甯罕恩慶曾向商辦改獎之事後由緬甯往猛永罕恩慶又向託帶送信之人周實餘均不肯承招該道以該將弁被訐各情雖皆有因尙無實據稟請提省訊辦臣等亦恐該道不無瞻徇因飭順甯府將李榮春等一併解省督同一司嚴加查訊

茲據錄供議詳核與迤西道原訊各情大略相同一時仍難定讞請示核辦前來臣等查該將弁被訴各情既非無因卽罪有應得已另片 奏參伏候 聖裁至耿馬土司承襲之事從前辦理原不無樞宜而現與土司罕榮陞子承父職自無疑義祇因其人過於庸懦於各土族既未能馭之以法又不欲聯之以恩致令互相猜忌爭奪不休在彼同室操戈起伏無常原未敢擾及內地而土族頻遭蹂躪邊防備費綢繆自不能不熟計豫籌以弭後患適據管帶練軍陳德厚稟請該營進拏猛撒查悉罕榮高退回猛角尙知畏懼隨派該營幫辦文生陳同善前往遮遮查探情形罕恩慶遣丁迎遞呈詞並自向陳同善訴稱遵諭散營投誠乞照罕榮高前案給地安置等情該副將意在誘擒許爲轉稟所辦尙合機宜當經批令會同道府就近妥商會稟核辦至十一月間長佑閱兵至大理府城陳德厚山營來見據稱罕恩慶所招野夷及游民散勇業經悉數遣散報查屬實惟自揣罪在不赦再三開諭未敢來營可否暫予安置徐圖查辦抑或添調大軍數路並進將該土族等痛予驅除並將該土司照例安置奏請改設流官永除後患等語詢之迤西道熊照鏡意見亦同因飭回營再加察看另候示遵臣長佑回省後與臣瑞聯細加商榷改流必須用兵勞費在所不惜惟該處密邇外夷水土極爲惡劣派往官軍尙難深入新設官吏豈能安居分地可息爭端且可令勢弱力單易於防制但處辦理不善如罕榮高分地之後仍滋事端可爲前鑒順

竄距省千數百里行文商榷往復需時此事辦已逾年未便再有延緩頃又據陳德厚稟報罕恩慶現在
遮遏隨身祇數十人時值瘴發並無變動似亦不無悔悟之心惟諭以隨同赴營始終不免畏縮請示如
何辦理前來等督同司道悉心籌議改流既多未使應作罷論惟罕恩慶畏死乞撫堅不赴營若遽進
軍捕拏必致逃匿異域且恐罕榮高中不自安仍與罕恩慶內外勾結日肆干戈該土司難以自存即邊
境日益不靖似不若因勢利導為欲取姑與之計查罕榮高於光緒三年經署順甯府知府周慶榕代稟
乞撫並請給還舊業比以瘴癘盛興兵難久駐姑允所請責令擒斬逃逆馬二以贖前愆乃該土族罔知
感奮猶復糾集夷匪習同罕恩慶爭佔土城實屬怙惡不悛姑念該土族於官軍進至猛撒隨即退回猛
角避諭散黨尚可從寬免其拏辦仍應勒令於前給兩猛地方劃分一處給與罕恩慶承受為業庶於包
容之中仍寓削奪之法一俟奏准即委廉明大員會同地方官前往查明界址妥議章程如該土族均知
悔悟與該土司共收親誼不起爭端數年後尚可為該土族陳請量給職銜俾得共延世祚倘再執迷生
事即當調集大兵將該土族悉與殄除為一勞永逸之計臣等因該土族屢生事端應貽邊患不得不將
現籌辦法縷悉陳明得 旨覽奏均悉即著劉長佑等派員會同地方官將劃界安插事宜妥為籌辦務
使各安生業永息爭端倘仍敢抗違滋事即當備以兵威以期一勞永逸毋稍遷就○庚午 上詣 觀

德殿 孝貞顯皇后几筵前行禮○尙賢奏恭讀七月初四日邸抄 上諭順天學政孫詒經奏考試八旗童生查明頂替四十四卷照例查究並請飭部嚴定章程等語童試爲士子進身之始宜如何束身自愛恪守功令乃此次考試八旗童試竟有頂替四十四名之多實屬不成事體該學政將其一併扣除查究辦理甚是嗣後八旗童試應如何革除積習嚴定章程之處著禮部妥議具奏欽此欽遵在案奴才跪誦之下欽感莫名仰見 朝廷軫念旗僕革除積弊以拔真材之至意惟是八旗考試弊端非止童試爲然而各場弊端又不止 京師八旗爲然八旗各項考試童試之外若繙譯秀才若筆帖式若助教若中書若繙本以及庫使除文場由學政考試外餘則均由 欽派考官局門按試立法本極周詳無如日久弊生思僥倖者多方舞弊以致頂替傳擄遂成錮習奴才世居 盛京每遇有繙譯各項考試皆係目覩本身應試者甚屬寥寥推原其故無力者以頂替爲獲利之階多財者以雇覓爲求名之計甚且頂替一人包繕數卷卽有本身入場者多屬官役傳遞題目試卷飛出場外道路傳播毫無避忌一二寒素之子學習繙譯數年其勢不能與久慣搶替者爭衡往往屈抑適阻上進之心故經取中後主考面試筆跡相符及能完卷者十無二三試官瞻徇畏難率皆不肯面試前任 盛京將軍都興阿任內考試繙譯因面試扣除甚多當時或譏爲嚴刻可見習俗相沿積重難返 盛京考試如是 京師各項繙譯考試其弊

亦所不免幸蒙 聖明燭照立除弊端奴才愚昧之見可否 飭下該部除順天八旗童試應議章程外
俯准將 兩京八旗各項繙譯考試一併嚴定章程以杜弊端而垂久遠又奏 盛京滿蒙漢各官學近
年以來廢弛已極現在宗室覺羅各學經將軍岐元一律修葺整齊親往閱課學中已有起色而八旗各
學半爲廢墟任人棲止該管官向無過問之時以致滿漢教習徒有其名官學諸生虛糜公費伏思學校
爲教化之原 陪都乃根本之地官學之設原爲作育人材誠以披甲之家率皆寒苦平時開口爲艱焉
能延師課讀有官學以誘掖之庶知所觀感鼓其向上之忱邇來 京師八旗均經設立義塾寒苦子弟
得有誦讀之所人材樂育成效可觀現在 盛京八旗學生通文理曉繙譯者已屬無幾若復聽其游嬉
性成勢將目不識丁比匪爲偶安望其他日勤奮當差曉暢營務爲國家出力之人殊負 朝廷教育旗
僕至意奴才目擊情形難安緘默可否 飭下該將軍設法整頓認真督察實力請求以增人材而重根
本 上諭翰林院侍講學士尙賢奏八旗各項繙譯考試請飭一併嚴定章程以杜弊端一摺據稱八旗
童試而外各項繙譯考試搶冒頂替弊端甚多殊屬不成事體應如何嚴定章程革除積習之處著該部
妥議具奏另片奏盛京宗室覺羅官學經將軍岐元等修督課已有起色八旗各學廢弛請飭整頓等語
著岐元等認真整飭隨時督察以增人材毋任稍有懈弛○辛未諭欽天監奏謹擇於本年九月初九日

孝貞顯皇后梓宮奉移 普祥峪 定東陵十七日永遠奉安所有應行典禮及一切事宜著各該衙

門及直隸總督敬謹預備○諭本年九月初九日朕奉 慈禧端佑康頤昭豫莊誠皇太后恭送 孝貞

顯皇后梓宮奉移 普祥峪 定東陵永遠奉安沿途毋庸另備御道○以曾紀澤為左副都御史○王

申 上請 觀德殿 孝貞顯皇后几筵前行禮○諭繼格畢道遠奏招商局協運江浙漕糧擬難破碎

過多等語漕糧為倉庾正供宜如何慎重起運本年招商局協運漕糧擬難破碎過多總由該委員等辦

理草率殊屬不成事體著直隸總督飭令招商局於協運漕糧時酌分道員一員常川駐津認真驗兌並

著江浙浙江各巡撫責成各該糧道嚴督辦漕各委員在上海天津與招商局兌米時加意查察務令米

色一律乾圓潔淨毋得稍涉含混致干咎戾○癸酉 上請 觀德殿 孝貞顯皇后几筵前行禮○甲

戌諭軍機大臣等有人奏贖陳閩省庸劣各員請飭嚴查參辦一摺所陳道員葉永元等劣跡如果屬實

應行從嚴懲辦著將各該員參款確切查明據實具奏此外如有庸劣不職之員並著隨時甄別據實該

督等繕詳兩廣廣東人捐納各官分發福建者甚多易啟鑽營情弊該督撫當破除情面遇事不得稍有

偏徇將此諭令知之○諭御史邵積誠奏此次 孝貞顯皇后大事工部郎中王慶鈞學習未久派充幫

總辦差使致人言嘖嘖請量為裁抑以資造就等語大員子弟在部當差原可藉資歷練惟王慶鈞到部

未久派充要差致招物議著該部堂官將該員暫總辦差使卽行撤去至所派總辦郎中景澧素稱雖資
格較深仍著該部堂官隨時察看毋稍瞻徇○乙亥 上詣 泰先殿 壽皇殿行禮畢詣 觀德殿
孝貞顯皇后几筵前行禮○以 穆宗毅皇帝本紀告成獎擢侍讀恩興等有差○丙子諭步軍統領衙
門奏要差需款孔急請飭迅撥銀兩一摺兩淮欠解該衙門幣利銀兩爲數甚鉅現因辦理隨扈差使需
用孔急著兩江總督嚴飭兩淮鹽運使卽行籌解銀四萬兩倘該運司難於籌解卽著該督在藩庫內無
論何款先提銀四萬兩迅速起解務於本年九月以前解到仍責令該運司如數解還藩庫以清款項○
寶廷奏恭閱 欽定大清會典門禁章程本極詳明但廢弛日久不能實力奉行雖屢經 嚴旨申禁終
屬虛糜故事若不深求其故變通辦理難期實效其所以不能實力奉行者其故有二亦不得專責之值
班統領也一由於餽餉不足不能整頓前鋒護軍官兵困苦已極費用不敷值班遂難免侵吞缺額方今
庫儲匱乏繼而前鋒護軍額不甚多似可量加不能因營徧加當於每日值班官兵酌加公費務使足
敷值班用度不許絲毫減扣 天子禁兵非他營可比獨優不嫌偏也費用既足乃可整頓矣一由於事
權不一不能整頓前鋒護軍統領十人每日輪值內務府復有護軍統領位均權分無所統屬互相推諉
安能實力整頓且官係武職二品未甚尊崇 禁門出入外而王公內而太監多所瞻顧詎敢嚴察擬請

特簡親信公忠王大臣一二人總司門禁諸事前鋒護軍統領內務府護軍統領皆歸統轄有不稱職

許其參劾以一事權而專責成責成既專更可整頓矣大綱既舉衆目自當漸張並詳稽舊例酌擬章程

數則以備 采擇一例載 國初定 紫禁城門密邇 宮殿百官執事人等不得擅行出入等語又凡

內閣及各部院衙門堂司官以至內務府官員均將姓名所隸旗分佐領內管領造冊冊書送登於版籍

工匠服役人等由本管衙門給火印腰牌書寫姓名持爲符驗又每門設紅杖各二有不報名擅入者撻

之又其門籍無名及不帶腰牌混入者送刑部治罪各等語定例至嚴當申明凜遵一又載 禁城以內

凡用夫匠人等責成該管官員面印圖記帶領出入又民夫亦不准太監人等擅行帶入 禁門各處交

納銀兩恭進 貢物祇准據至 禁門以內掃雪步甲一體給與腰牌各等語定例極詳亦當申明凜遵

一嘉慶十六年軍機大臣等會議門禁所奉 聖諭尤當敬謹遵守其所議各條頗爲嚴密亦應凜遵一

各衙門引 見人員值日加班一切當差人員應由本衙門前一二日咨行值班護軍統領開明銜名數

目以便查核除堂官外每員給印文一紙入門時隨本身職名交納值班章京收執查驗放入出時自取

在京請 訓請 安謝 恩各員亦當前一日由本衙門咨明值班護軍統領上封事者亦當自帶職名

到門交納一王公官員等各有應出入之門近年則皆由 景運門 隆宗門出入一旦使依舊例不但

人情不便且天未明時門多亦難稽察似可變通仍准昔山 景運門 隆宗門出入以便稽查一外來
請 安請 訓謝 恩人員亦當備帶印文到門交納以便稽查一是年所議隨帶人數乃隨入 景運
門 隆宗門當差者於僕從未曾指明查舊例太歲後又未免太寬文職七品竟准隨帶二人擬酌中定
爲除王公外一二品許帶四人文職京堂武職三品許帶二人其餘止許帶一人入 禁城門時將所帶
人名開單報明隨身帶入各依例准至之地停止如有違者照例責處一太監原不准私出近來未免隨
意出入甚或隨意將親屬帶入並聞各僕役隨意出入護軍統領因太監係 宮中當差之人遂任其往
來不敢稽查從此流弊滋多不堪設想嘉慶十八年之事可爲鑒戒欲嚴門禁必先嚴查太監否則斷不
能嚴擬請 嚴飭內務府嗣後太監無故不准私出 禁城其素有 差使而出者亦須給與執照以免
假託令內務府添造有印執照上書有差外出四字若干張分交各宮如有差使付與執照到門驗明放
出將姓名登籍歸時驗明放入不准多帶一人無執照者即係私出拿交內務府其告假外出者則由內
務府轉行 景運門傳知各門放出歸時驗明放入不准多帶一人如有徇隱私放出入者官參處兵責
革其告假則由總管太監將姓名原由限期行知內務府仍當敬遵乾隆四年 聖諭不得過一日二日
免致在外生事 宮中遇有零星活計放匠修整舊敞遵嘉慶十年 聖諭毋許太監任意傳喚以昭嚴肅

此輩多寡少良擅作威福時有嚴旨飭禁護軍統領尙多顧忌否則將任其擅出擅入招引外人矣一

禁城各門首當嚴查外門不嚴內門無從而嚴蒼霞門僻在東夾道易於私行出入尤當嚴查春

華門內通中正殿出入尤易滋弊且與長春宮相近尤當慎重似當添派章京護軍實力稽查喇嘛

出入亦當一體嚴查不准雜人混入一門禁廢弛已久各處器械未必堅利當一律添換務求適用不

徒壯觀例有烏鎗之處可否添給洋鎗以資利器一六班王公及文武大臣責任本重近日已成具文進

六班與補進王公皆有看守台符之責當擇老成持重與年雖少而精明幹練者以昭慎重並令景運

門每日將各處值班官員銜名兵丁旗分額數門單行知值班王公文武大臣以憑查核一例又載造辦

處及內務府衙門人役眾多總管內務府大臣每日各派司員二人稽查立法甚善近亦成爲具文當中

明兩邊右列各則有載在舊例者有因例變通推廣者奴才於禁城諸事知之未詳所擬是否伏乞

飭下御前大臣軍機大臣內務府大臣前鋒護軍統領迅速會議章程有奴才所未言及者當詳摺舊例

按切時事酌辦務期嚴密詳明毫無遺漏門禁爲此時至要之事關係重大不可因臣工出入不便遂因

陋就簡也章程既定必當嚴飭實力奉行如有疏懈重責不貸否則仍無實效近來積習因循已極卽

以觀德殿齊集論之前奉 上諭禁止閒雜人等歷時未久已成具文諸大臣頗有帶僕從入門者當

此嚴申門禁之際竟玩忽如此由此一端觀之非大加振作門禁不能禁也又奏例載 聖駕出入及升殿上朝官員隨從人役有喧譁擁擠者拿交治罪又凡遇 壇 廟祭祀及 升殿之日各執事官軍人等各該管官員等統率而進告知人數一併放入各等語近來每逢前期 太廟行禮 午門外閒雜人等甚多殊屬不成事體請 嚴飭護軍統領嗣後凡遇 聖駕出宮務當督率官兵清蹕不准閒雜人等攙混潛藏當先驅盡以昭慎重過 皇上至 大高殿等處拈香亦當一體嚴查勿如 觀德殿齊集之虛應故事也再執事儀仗人等因費用不足多有替代請 飭所司嚴查不可輕招閒雜人替代天顏咫尺諸當慎重費用不足亦當少加 上諭內閣學士寶廷奏門禁宜嚴詳稽舊例酌擬章程一摺另片奏蹕路經由未能嚴肅等語著御前大臣軍機大臣內務府大臣前鋒統領護軍統領會同妥議具奏○丁丑 上詣 奉先殿 壽皇殿行禮○戊寅諭兵部奏請飭各省題報現年兵馬數目一摺各省兵馬數目例應於每年十月具題造冊報部該部於年終彙題所以備考察而杜浮冒現除浙江依限題報外其餘各省率多辦理遲延甚至積壓年久竟不造報實屬不成事體該部以各省欠報年分甚多若令以次遞補則到部之冊所報並非本年而本年之冊到部不知何日請飭欠報各省即將現年數目造報係為清理積贖起見著直省督撫自光緒七年起將本屆兵馬數目按年造報毋逾例限如再遲延

卽著該部奏將該督撫及營員從嚴議處以儆玩泄○己卯曾國荃因病奏請開缺不允予假三箇月
○以孝行可嘉予直隸吳橋縣文生祝銘恩通州屯旗武舉勝玉山旌表○黎培敬奏清淮一帶制錢缺
乏查照同治年間成案於清江城內試開通源官錢局以平市價報聞○涂宗瀛奏河南候補人員仍形
擁擠請再展停分發一年下部議○庚辰諭本年九月初九日朕奉 慈禧端佑康頤昭豫莊誠皇太后
啟鑒恭送 孝貞顯皇后梓宮奉移 曹祥略 定東陵永遠泰安十三日恭奉 孝貞顯皇后梓宮暫
安 隆恩殿十四日祇謁 昭西陵 孝陵 孝東陵 景陵 裕陵 定陵後敬詣 几筵前行饗奠
禮畢祇謁 惠陵十六日敬詣 几筵前行遷奠禮十七日奉安禮成恭詣 神牌還京 升祔 太廟
二十日朕恭奉 慈禧端佑康頤昭豫莊誠皇太后還宮至恭詣 神牌還京仍著毋庸另備御道所有
應行典禮及一切事宜著各該衙門及直隸總督敬謹預備○予故順天府尹李朝儀政績交國史館
立傳○胡隆洵奏稱刑律強盜已行但得財者不分首從皆斬雍正五年九卿遵 旨議定盜劫之案將
法所難宥情有可原者分別正法及發遣咸豐初年逆氛竄擾盜賊蜂起五年二月欽奉 諭旨仍依本
律不分首從皆斬同治年間迭經給事中王憲成升任司業孫詒經侍郎鮑源深夏同善等先後奏請復
歸舊制刑部議俟數年後察看情形再行奏明辦理在當時軍務雖已漸平而盜風未能盡息執法者因

時制宜不得留重典以繩之方今軍務肅清已久百姓相率歸業凡各直省興養立教諸政無不次第舉行是今日之天下正國家培養元氣之時後祖制而廣皇仁此時不容緩矣欲推恤刑之心宜先復原情之律夫劫盜夥犯豈盡無良或迫於饑寒或被人誘脅原其情節實可哀矜請將盜劫之案於法所難宥情有可原者仍照分別首從舊例辦理得旨刑部議奏等部議請將就地正法章程先行停止諸旨飭下各省督撫將軍都統府尹體察情形將夥犯持械強劫案件仍照成例解山該管上司覆勘分別題奏不得先行正法迅速妥議具奏從之○辛巳上詣觀德殿孝貞顯皇后凡筵前行禮○予故原任貴州提督張文德於貴州省城建祠○甲申賞前任刑部尚書桑春榮太子少保銜准重赴鹿鳴筵宴○李鴻章奏天津郡城規模狹小城內民居無多且井少水鹹難供汲飲是以富商大賈多在城外其東北關廂一帶尤為精華萃聚必須嚴設關防用資保障咸豐九十年間前親王僧格林沁令官紳捐修外耳濠牆同治七年捻逆竄至兵民協守深資其力迨十年十一年迭被大水冲塌已成平地臣於去秋商飭長蘆運司如山津海關道鄭藻如天津道吳毓蘭會同詳細勘議集捐興辦應仍舊址酌加展寬從新修築素土圍牆一道計長六千七百餘丈高一丈一尺頂寬一丈二尺底寬三丈六尺至四丈五尺牆頂靠外加築垛牆一道高四尺頂寬二尺底寬四尺牆腳一二丈外挑濠一道計長六千九百餘丈

而寬三丈至八丈底寬一丈至五丈深五尺至九尺卽以挑出之土築牆有不敷者於他處取土加築又土牆周圍建營門十四座兵房二十一間以便看守啟閉牆上修土礮臺二十八座以扼形勢牆裏開馬道三十四條以便登陟牆外建木橋五座以便行人牆根置水關六座涵洞六座石閘一座以宣洩水勢卽將通工分作三大段北運河西岸至南運河連南爲一大段南運河連南至海河西岸爲一大段海河東岸至北運河東岸爲一大段由如山鄆藻如吳毓蘭各督府縣委員雇募民夫分段承辦去冬未凍以前先將濠牆土工趕築就緒今春開凍以後接辦垛牆礮臺營門兵房馬道橋閘於六月初十日一律竣事卽親往督同道員朱福榮萬國順周厯逐細驗收牆臺均係層土層垛築厚一尺打實七寸濠身深廣水關外用洋鐵鈔木作成樑柱堅結異常其餘各工亦均穩固經久所需工費撥節助支計共用銀七萬九千四百餘兩如山鄆藻如各捐銀一萬兩吳毓蘭捐銀一千兩天津府知府宜霖捐銀六百兩天津縣知縣郭司中捐銀四百兩長蘆鹽商公捐銀二萬兩其不敷銀三萬七千四百五兩九錢六分二釐已於加增洋藥捐項下撥補竊維津郡爲海疆重地城外商戶民居日益繁盛難聽其四通八達毫無屏蔽屢擬修復耳牆苦於經費無出今幸官商合力迎籌已將濠濠三十餘里剋期告竣更於扼要之處增築礮臺以相策應又相度地勢高下建置水關閘座涵洞不特宣洩洪水而環濠民田亦可就近引灌

洵於地方形勢民間生計有裨現已飭派弁兵常年看守遇有坍塌淤墊仍由該司道各按原辦段落自行籌款認修若值交卸應囑明各工是否完善令接任司道出具收管照章修辦務使歷久不廢永資捍衛除虛商捐款係通綱商人分作五年按引零星攤繳無庸議獎辦理出力委員由司酌給外獎外惟該司道等倡捐銀兩力成要工實屬保衛地方盡心民事如山鄭藻如各捐銀至一萬兩之多尤堪嘉尚擬請 旨勅部將該司道府縣分別從優議敘以昭激勵此項工費大半係屬捐款且辦理甚為核實並請免其造冊報銷俾省煩費得 旨如所請行○乙酉予江蘇武進縣烈婦吳丁氏等旌表○何璟岑毓英奏 等前欽奉 上諭臺灣為南洋門戶防務緊要等因欽此當經 毓英奏請由黔酌帶官兵赴閩遣用欽奉 諭旨允准在案伏查臺灣地方孤懸海外日本窺伺已久不早籌整備之方則戎心易啟不量予變通之策則兵氣不揚 毓英奉命督辦責無旁貸惟有懷遵 聖訓隨時親往履勘認真經營該處情形其北開闢未久尤關緊要而赴臺輪船向來由羅星塔出五虎口繞道廈門澎湖必須三十六箇時辰始能到岸設遇風狂浪大顛簸就延日期更難預定若改由五虎口徑赴臺北只須九箇時辰即抵基隆甚為妥速而由基隆至臺灣府城亦不過旬日可至 等再四籌商擬卽以此路為渡臺正路並咨商船政大臣黎兆棠撥大輪船一號長為渡臺之用至由南臺到五虎口用小輪船往來甚便 毓英擬將

續辦清理完竣定於閏七月十三日即行渡臺山臺北至臺南沿途查看應如何整頓咨商臣璟妥爲籌辦前奉 旨准調黔安義等營練軍二千人臣毓英已飭藩司匯撥行裝行糧夫價等銀並撥行記名提督何秀林等分起營帶不動聲色陸續前來俟到閩後擬以二百名留爲護兵以二百名駐紮五虎口其餘一千六百名均分紮臺灣惟通省吏治刑名錢穀皆是巡撫專責事務殷繁歷任前撫臣渡臺撫署題奏咨案係交督臣代辦日行事件委藩司代行代拆本年臣璟奉 旨查閱營伍即須出省已將督署日行公事委藩司代行代印臣毓英現遵 旨渡臺撫署尋常事件擬照例亦委藩司代行代印如事關緊要仍送 臣行營覈辦臣毓英俟將臺防查勘後詳細奏報即先旋省清理案牘以後或兩月渡臺一次或三月渡臺一次隨時往返布置庶政務臺防均可兼顧其內地沿海要口臣璟自當會同福州將軍臣穆圖善督飭水陸提鎮加意嚴防不容稍有疏懈以仰副 聖主軫念海疆之至意奏入報聞○丙戌上詣 壽皇殿行禮○與俄國互換條約○予浙江松陽縣烈婦張湯氏旌表○丁亥諭兵部奏請飭催積欠租銀一摺直隸各州縣應解兵部馬館地租生息銀兩積欠甚多本年九月間 孝貞顯皇后梓宮永遠安該部應付車馬煩多需款孔亟著直隸總督飭令藩司無論何款即行設法於歷年欠銀六萬七千八百餘兩內先撥銀二萬並將本年租銀二千八百餘兩如數措齊限於閏七月內撥解到部毋得

遲延嗣後務須年清年款不得再有拖欠○戊子諭榮毓等奏應行急修各工請派員查勘一摺 昭西陵碑亭等處工程均有朽圯坍塌情形著派興廉敬誥查勘奏明辦理○己丑彗星見西北方○召劉坤一入覲以彭玉麟署兩江總督兼署辦理通商事務大臣○何璟奏安插琉球遭風難民西銘等量予賑恤將來如何回國另行察看辦理報聞○丁寶楨奏慶寧營山水陡發沖毀衙署倉庫民地及省城鹽市口等處被火情形得 旨著飭屬確查被水被火災黎妥籌撫卹毋令失所○庚寅 上詣 觀德殿孝貞顯皇后几筵前行禮○彭玉麟奏兩江軍需總局原係總督札委局員會同司道主持自趙繼元入局恃以庶常散館捐升道員出身又係李鴻章之妻兄賈弄聰明妄以知兵自許由是局員營員派往修築者皆惟趙繼元之言是聽趙繼元輕李宗義為不知兵忠厚和平事多蔑視甚至督 臣有要務札飭總局趙繼元竟敢違抗不遵直行己意李宗義旋以病告去趙繼元更大極猖獗目空一切礮臺坍塌守臺官屢請查看修補皆為趙繼元掣轡不行 臣恐劉坤一為其所誤力言其人不可用劉坤一札調出局改派總理營務亦可謂優待之矣而趙繼元敢於公庭大衆向該督 臣力爭仍要署理局務本不知兵亦無遠識嗜好復深徒恃勢撓權妄自尊大始則自炫其長後則自護其短專以節省經費為口實惑衆聽而阻 臣言其意以為夷務有事不過終歸於和江防海防不過粉飾外面故一切敷衍不求實際其實妄

費甚多當用不用大家皆瞻徇情面以爲局員然手軍需公務歸其把持將來海疆無事則防務徒屬虛文一旦有事急切難需必至貽誤大計夫黜陟之柄操自朝廷差委之權歸於總督豈敢擅便惟既有見聞不忍瞻徇纖默恐終掣實心辦事者之肘而無以儆局員肆妄之心上諭彭玉麟奏道員辦理局務諸多謬妄等語江蘇候補道趙繼元嗜好素深辦理兩江軍需總局遇事把持任意蒙蔽於應辦各務粉飾敷衍毫無實濟實屬劣跡昭著請繼元著卽行革職以示懲儆○岐元等奏前因昌圖府屬之康家屯地面遼闊獄訟煩多奏請裁撤經費添設康平縣知縣一員典史一員並在鄉家屯添設主簿一員以資分治當經酌議章程會同具奏奉旨該部議奏單開併發欽此嗣准部咨以康家屯雖係昌圖府屬惟新設康平縣知縣一缺原單內稱係屬煩難中缺與懷泰兩縣沿邊煩難緊要之缺不同缺分既有繁簡之分後廉辦公等銀未便按照沿邊緊要之缺支食行令酌量核實刪減以示區別等因奴才等查新設康平縣地處邊疆輻輳遼闊本係蒙古地面並無經徵錢糧實與懷泰兩縣事同一律因該縣所轄地方瘠苦不如懷泰富庶是以定爲煩難中缺其爲蒙古代催地租辦理命盜各案與懷泰無異所請廉俸役食等項概發實銀原爲養其廉隅俾得盡心民事若令酌行刪減使其辦公竭蹶內顧多虞何能勤求吏治惟有仰懇天恩俯念新設康平縣地方瘠苦正佐各官應支廉俸役食辦公等銀仍准援照懷

德奉新兩縣章程概行給發實銀免其刪減實於吏治民情大有裨益得 旨如所請行○涂宗瀛奏光緒七年七月初八日准刑部咨覆河南鎮平縣職員張肯堂家被劫案內夥盜胡體安一犯奉 旨胡體安著即處斬餘依議欽此當即欽遵轉飭臬司與軍標中軍將率同封府暨祥符縣查明不停刑日期親提監犯胡體安驗明正身綁赴市曹處斬在案是月十一日軍風聞斬犯胡體安有臨刑呼冤之事正在飭查間旋據臬司據山轉據開封府知府唐成仰稟報監提胡體安驗明綁赴市曹聞該犯極口呼冤據稱伊名王樹文係南陽府鄧州東鄉大江營人家有父母兄弟妻室並非南陽縣民之胡體安亦無夥劫張肯堂家情事係被誤拿畏刑妄認等語稟復前來同日先據審轉官前任南陽府知府升任開歸陳許道任愷前署臬司現署糧儲鹽法道調補南汝光道麟春面稟當飭勘轉此案盜犯胡體安時並無刑審犯供核與原審相同絕無異詞現聞該犯臨刑呼冤請即提犯覆訊俾免冤抑等情查該犯胡體安臨刑呼冤是否果有冤抑或係妄行翻異莫延顯戮應即覆鞫以免枉縱下刑部知之○諭鑾儀衛奏要差需款請飭撥解銀兩一摺鑾儀衛恭備 孝貞顯皇后梓宮奉移 曹祥峪 定東陵永遠奉安一切要差需款孔亟直隸長蘆歷年欠解該衙門地租生息銀兩為數甚鉅著直隸總督嚴飭藩運兩司無論何款先提銀四萬兩務於八月初十日以前解到所解之款即飭藩運兩司由歷年拖欠地租利銀項下

歸還藩運各庫以清欸目至每年應解地租利銀仍著照舊批解毋再延欠○是月命三品京堂鄭藻如爲出使美國兼日國秘國欽差大臣始裁副使

閏七月辛卯朔以圖瓦強阿爲塔爾巴哈臺領隊大臣○壬辰予四川巴州孝婦邵袁氏旌表○勒方鐸奏州縣爲親民之官胥役鮮安分之輩詐贓斃命科罪最嚴定例地方官於衙役家丁因事釀命失察處分均應降調卽自行訪拿究辦亦不得藉詞免邀蓋於胥役擾民甚於盜賊嚴懲積竄尤難曲宥昏庸例意昭垂至爲慎重惟思丁役滋事之案全賴該管官隨時摘發按律懲治方足以昭儆戒若業已自行拿辦猶干降調處分則州縣自顧考成必至憚於發覺丁役洞知底蘊轉得肆其挾持於是抑勒事主轉輾賄和沉寃莫伸巨奸漏網上司見聞所及勢難深燭隱微下民愚懦可欺未必盡能控訴是處分愈嚴諱匿愈甚城狐社鼠恐且因是而愈張近歲以來各省丁役滋事由該管官自行舉發者十無二三是其明驗也臣愚以爲欲除衙蠹之害當絕瞻顧之私與其立法過密而瞻庇適快奸欺何如更議稍寬而扶摘全無顧忌伏查逆倫重案隨時懲辦恐多諱飾未定處分嘉慶十八年間欽奉 諭旨遵行有案其餘命盜雜案疏防失察各處分一經拿辦均准寬免查銷則丁役滋事釀命失察處分似亦可變通辦理應請嗣後家丁胥役詐贓滋事逞凶釀命查係該管官通同婪索知情縱容或知而不舉別經發覺者應照舊

例嚴議治罪以示懲儆如實止失於覺察自行訪拿究辦者由該管上司確查隨案聲請免議倘有捏飾瞻徇情弊另行專摺嚴參如此則該管官有訪拿之權無降補之慮得以有犯必懲而家丁胥役咸知本官無所要挾自當謹慎刑章不敢以身試法矣下部議奏○劉瑞祺奏釐金所以裨益國用在通都要隘財貨流通商賈不苦於輸將餉源亦藉資挹注其不能遽議裁撤者勢也若其地鮮嘉產道非衝衢潮貨之來路固已歷經關口而無倖免於捐之物究貨之去路則又耽延時日而有不堪重創之情下如肩挑背負者流時或抽釐僅制錢一二千文及數百文不等密網頻擷咸嗟嘆於生計之窮而莫由措手且設一卡必另分數卡委員之薪水司事巡丁之薪水與夫局中所用一切雜費及年終總計則有入僅敷出者有出入相償而盈餘僅二三千金左右者揣之民隱殊非所願揆之國計又何需此區區耶若此情形東南數省爲多西北次之擬請旨飭下各省督撫將所有釐卡歷年盈餘實數悉心綜核劑以權衡大者由之小者撤之一一報部備查不得以仍舊了事庶幾上籌國用下卹民瘼以得乎仁施義應之道上諭給事中劉瑞祺奏各省抽釐設卡請飭權衡出入酌量撤留一摺各省抽收釐金迭經諭令核實辦理若如該給事中所奏情形實屬無裨國計著各該督撫將各釐卡出入數目悉心綜核酌量撤留報部備查不得以空言塞責將此通諭知之○內中予湖南湘陰縣節婦左郭氏旌表○續奏圍場

總管吉凌較近年歷任總管最為妥實無如所屬各員因積習已深疲玩特甚於緝捕偷竊攔阻閑人尋常各事宜尙不敢公然廢弛若令查拿成夥盜賊萬不足恃奴才再四籌思現在正剛僅存四十一處若不加意防閑殊非慎重之道除責成剛場總管嚴切申明守卡巡圍定章飭屬實力奉行認真整頓外擬由熱河駐防前鋒馬甲內再行抽練五十名歸入原設練軍隨時酌撥派員帶領進圍逐處搜查如有盜賊結夥潛匿卽行拿解懲辦以肅圍疆所有加練各兵需用馬匹餉乾仍照駐防練軍章程一律辦理應支銀兩由圍場地糧項下動撥另行報部核銷報聞○崇綺奏熱河地方幅員遼闊馬賊出沒無常奴才自抵任以來一有所聞卽酌撥練軍協同該管地方文武各官認真查拿照章懲辦至圍場地而其招聚處所人民良莠不齊亟須整頓業將前駐朝陽之馬隊練軍一百名陸續移調在於勘放之東西兩兩各地方分路駐紮以資巡緝而內圍重地尤多幽邃之區且外與蒙古部落及多倫諸爾廳等處毗連逸犯匪徒最易藏匿節經奴才督令圍場總管嚴飭該翼長等官加意巡查並札飭駐圍練軍嚴密防緝本年五月內聞內圍右翼地面有馬賊聚眾踞四出搶劫馬情事飭據總管吉凌查報屬實當即札飭先經派往搜緝之管帶駐防練軍協領銘和及管帶駐圍練軍署入滿營參將陳飛熊合力進剿詎該馬賊先期竄往赤峯縣西北境內搶劫鋪戶旋即折回內圍經銘和陳飛熊分督熱河防禦佛爾渾泰千總李

潤把總楊慶外委趙永清等帶領練軍分投掩捕總管吉凌亦督飭團兵協同緝拿前後拿獲賊匪十一名並經練軍在內圍正黃旗地面之拐磨子溝將馬賊建造窩鋪二十餘間全行焚燬起獲賊馬二十餘匹該馬賊約尚有八十人無所託足奪路狂奔山西圍竄出向西南一帶逃走銘和陳飛熊督飭練軍星夜追捕該馬賊於六月二十二日竄至豐寧縣屬大閣兒西南之大草坪地方經前隊練軍李潤楊發跟蹤追及適大閣兒汛把總任家樹亦帶兵趕到合力捕拿該馬賊膽敢放鎗拒捕並傷練兵一名官軍奮勇攻擊匪勢不支紛紛棄馬越山竄逸計格斃馬賊十餘名生擒二名奪獲賊馬五十餘匹鎗械多件復經銘和督帶練軍馳赴大草坪迤西迤南沿邊一帶地方逐細搜查該匪等均已逃散無蹤除札飭地方文武員弁並密派練軍分路緝辦外奴才於該匪被剿後即分咨直隸總督提督察哈爾都統密雲副都統宣化鎮總兵嚴飭守口巡查各弁兵協力堵緝俾免蔓延先後拿獲馬賊陳大舌頭卽陳廣身等十三名訊明後當卽照章就地正法現在內圍已構安前仍嚴飭圍場總管督飭翼長以下各官不時周查不准再有疏虞惟此次馬賊於正黃旗地方搭蓋窩鋪聚集多人四出搶劫該翼長防禦騎校等官如果認真巡查何以毫無知覺似此任意玩泄未便稍事姑容相應請 旨將右翼翼長德順正黃旗防禦豐伸泰驍騎校常安一併革職以示懲儆左翼翼長富順向有輪查之責亦難辭咎應請將該員革職留任

以觀後效得 旨覽奏均悉仍著崇綺督飭弁兵將逃逸馬賊緝拿務獲毋任漏網其失察之翼長德順

防禦盟伸泰驍騎校常安著一併革職翼長富順著革職留任以觀後效○丁酉 上詣 觀德殿 孝

貞顯皇后几筵前行禮○戊戌召克敦額入覲詢懷訓為西安將軍岐元為成都將軍以崇綺為盛京將

軍調額勒和布為熱河都統○己亥諭吏部奏革員等盜賣捐案請飭刑部提訊一摺已革工部主事黃

河清與職員黃文瀚通同作弊將捐納道員李逢盛捐案盜賣移獎經李逢盛將黃河清信函呈由四川

總督咨部核辦該革員等朋比為奸盜捐舞弊亟應澈底根究著刑部迅速行提人證確切研訊按律定

擬具奏○衛榮光奏管省負山帶河本無舟楫之利而且風高土瘠物產不豐其恃以輾轉運交易有

無者僅東北平定一隅為商賈通行大道仍須經歷四門之險而後出者方能達於直境入者方能達

於晉境此向來出入物貨車運歇載之情形也查四門皆踞太行之脊即古所謂井陘天險上而蹬道

盤曲下而河灘紆迴行卒往來無不動色相戒近因年久失修又多覆車壓馬之患商民交困莫可誰何

伏思晉省屢飢之後民氣凋殘培補之方自以通商惠工為要若再令此道日久閉塞實於民間生計不

宜亟應一律興修藉資開拓比經兩商直隸總督李鴻章嗣准兩覆亦以興修天門為目前要務並許竭

力欣助俾免偏廢臣以李鴻章素顧大局凡有益於民生之事無不勇為但此項工程係屬專為利益晉

省起見應由臣獨力認辦方為允協惟費煩工鉅既須兼顧通籌又應力求撙節當將白竹扁榆次縣之什貼鎮起至直隸獲鹿縣所屬之土門口止應修工程飭委平定州知州王彬分作石工土工兩項查辦蓋青石一項可就山開鑿不須價買祇須工錢土工一項擬仿直隸治河之法即令留晉湘毅軍與撫標練軍兩營分隊認辦所費既可從省而藉令各軍習勞供役亦屬一舉兩得查候補道吳其復馭兵整肅熟悉地方情形於工程一事亦尚諳練應即派委該道督飭兵勇依法修理並咨會李鴻章札飭該地方官照料彈壓抑或委大員一同駐工監修俾就平治此後道路無復險阻貨物皆可流通於災後疲弊無裨益至此項工費擬於善後款內籌動將來應歸入善後案內一併造銷請免專案報部以省案牘報聞○庚子 上詣 觀德殿 孝貞顯皇后几筵前行禮○辛丑諭興廉奏遵查專案工程請旨辦理一摺所有 景陵 愍惠皇貴妃園寢門座等工著派本年承修另案工程之大臣烏拉恭阿薛允升敬謹承修至 孝陵七孔橋工程著暫緩修理○壬寅以麟書為鑲白旗漢軍都統○甲辰諭軍機大臣前據御史秦鍾簡奏李鴻章奏調編修洪鈞道員金福曾袁保齡跡涉徇私請旨撤回等語著李鴻章隨時察看如該員等不能得力即行撤回原摺著鈔給閱看○諭軍機大臣等前據曾國荃奏陳病難速痊情形當經賞假三箇月安心調理此時節交秋令該督所患各證能否日就痊愈殊深廑系近聞關內外降

回聞有潛至陝境窺探並混入西安城內夏回之事深恐漢回猜忌滋生弊端非得威望素著之大臣鎮撫其間不足以靖邊陲而消隱患會國荃近日病體如已調攝就痊著卽前赴新任毋庸來京請訓以紓朝廷西顧之憂該督素性公忠視國事如家事想能勉任其難用副倚畀此旨到後卽著酌量情形能否卽行赴任迅速據實覆奏將此由五百里諭令知之○諭鮑超所部現在留防馬步十四營全行裁撤仍由輪船裝運赴鄂○諭御史莫勗庭額奏文武鄉會試各事宜擬請量爲增改一摺著該部議奏○周恆祺奏臨清關居汶衛兩河之中全賴南北商販往來流通藉能徵足稅額汶河上達江漢閩廣所有山珍海錯綢緞絲棉以及洋貨茶船從前均由清江入運北上過關報稅物價賤貴收數亦多故應徵銀兩約居定額三分之二衛河僅達豫省而上並無貴重土產惟以糧食爲大宗其次則石塊鐵條貨物較賤稅則亦輕故應徵庫銀僅及定額三分之一溯自黃水穿運以來張秋口門淤塞汶河成爲平陸舟楫鮮通凡東北各省貨物之北來者皆用輪船裝運由海口直達津沽汶河久無船隻往來稅源因而斷絕近年臨關稅庫專恃衛河一路歷年徵收銀兩均已不能如額乃本年豫省二麥歉收更少北行糧販又因上游紛設卡商人慌於節節輸將率多繞越此外如山西鐵貨向由衛輝彰德用船裝運至畿輔一帶行銷現因洋鐵盛行西鐵滯滯商販亦多裹足此戶關稅無來源之實在情形也工部定額八千餘金應

徵竹木等稅而木牌竹筏久無此物經行現惟船料一項爲數無幾官差營弁又往往恃札諭爲護符兼以外洋蓋印通單船貨均不納稅以致虧短尤鉅此工關徵收短絀之實在情形也計自本年正月起到六月初三日止半年之久戶工兩關僅收正耗銀一萬四千八百餘兩刻下河汛漲發商船仍復寥寥收數之微較前尤甚轉瞬關期報滿若貴令著賠議處未免向隅據濟東泰武臨道李宗岱轉據臨清州具詳請奏前來臣覆查無異雖屢次設法招徠無如汶河淤墊人力難施今因豫省麥收歉薄以致稅源更少實非經徵不力合無仰懇 天恩俯准 敕部查照俟年滿奏報時免其議處著賠下部議奏○乙巳上詣 觀德殿 孝貞顯皇后几筵前行禮○左宗因病懇請開缺不允予假一月調理○李鴻章奏統領銘軍記名提督劉盛休所部礮隊各營拉礮馬匹操演日久漸多老弱疲羸難期得力茲據稟派守備沈百賢千總丁文喜前赴喇嘛廟一帶挑購驍壯戰馬一百匹解營以資補換請 旨飭部給崇並知照張家口監督照例免稅放行得 旨如所請行○岐元等奏邊外游民佔墾地畝與朝鮮僅一江之隔當經奏明循照舊章按四季派員出邊統巡夏秋二季與朝鮮國地方官公會哨稽查等因在案本年四月委派城守尉載昶作爲夏季統巡前往巡查並照章咨行 盛京禮部先期知照朝鮮國王飭令該國地方官會哨去後茲據該員詳稱馳抵邊外巡查於五月初一日與朝鮮官金鳳求公同會哨該使

臣親遞邊境肅靜印結一紙由該城守尉呈遞前來除存查外奴才等復嚴飭秋季統巡之員認真稽查以肅邊境報聞○丁未諭吳大澂奏請調員差委等語江蘇海州直隸州知州廖綸揀選知縣潘民表著兩江總督江蘇巡撫飭令前往吉林交銘安吳大澂差遣委用候選通判郭之楨既據奏稱現在丁憂著毋庸調往○命程豫范梁來京以鹿傳霖為四川布政使倪文蔚為廣西布政使張凱嵩為四川按察使張勳為廣東按察使○李鴻章奏准部咨光緒七年四月二十九日奉 上諭給事中樓譽奏直隸安州雄縣新城地方近有匪徒勾結蠶役私設卡局抽收船戶錢文等因欽此當飭清河道葉伯英於出省防河之時認真查辦茲據該道詳稱安州北關雄縣南關新城縣白溝河為津省水路要衝每年有承運西陵米石並經營漕運官剝船隻陵米例領水腳無幾官剝工食亦微均須另籌貼補且夏秋陸路被水往來文報及餉鞘人犯均應改由水路遞送船差絡繹供億甚繁該州縣並無例設水驛不能開支工料而運米等項又屬要差勢難延誤是以向章借貸過往商船津貼派撥船頭常川伺應以期上不誤差不累民並非私設卡局亦與任邱趙北口情形不同同治十一年船戶馬萬福呈控安州船頭龍索飭據保定府查訊將向章所收錢數酌量議減凡大貨船每隻津貼制錢四百文小貨船每隻津貼制錢一百文煤船每隻津貼制錢二百五十文其餘商民回空及官民坐船概免津貼又雄縣新城於光緒

二年文安縣船戶張萬成呈控案內飭據司道查明酌議津貼錢數凡滿載貨船如願包年每歲不論往來次數多寡大對子船津貼制錢二千文小對子船津貼制錢一千四百文廠船津貼錢一千八百文如願按次津貼大對子船津貼制錢四百五十文小對子船津貼制錢二百五十文廠船津貼制錢四百文篷船等船津貼制錢二百文其餘貨船回空及官民坐船概免津貼均經核定批准榜示河干其雄新二縣並已刊立碑石在案該道以該船頭等果皆照章收取津貼供應差務何至擾累商旅噴有煩言乃訪聞商船於交納津貼之處尙有規費顯係船頭書役從中勒索卽經督飭各州縣將船頭書役人等提案肅革一切浮費盡行裁除由該道刊刻原定津貼章程嚴禁需索告示於省城南關安州北關雄縣南關新城縣白溝河及商船往來停泊埠頭徧行張貼並飭該州縣重泐碑石樹立河干一面將告示移送天津官船局曉諭船戶一體遵守倘該船頭等再敢額外需索許船戶卽赴所在地方衙門喊控立拘船頭等嚴行究辦枷示河干該管州縣稍有徇庇或漫無查察別經發覺亦卽從嚴參辦等情具詳前來臣查直隸賦額甚輕原因畿輔重地徭役較煩須藉商民之力以之挹注船差亦其一端臣前沿河州縣曾有匪徒勾通書役索詐商船迭經臣與司道等訪聞查辦將並無差務各處私設船頭卡局禁革殆盡並於天津設官船局均平差徭照民價雇用不准絲毫擾累安州雄縣新城既有年例例運陵米等項要

差地方又皆瘠苦勢難加派民間是以向借過往商船津貼係爲體恤閭閻免誤差務起見歷就該州縣應差輕重議定津貼章程酌減收數尙屬公允惟該船頭等藉端格外勒索殊堪痛恨現經葉伯英督飭該州縣提案革除並將津貼章程徧行曉諭重泐碑石應飭該司道等隨時認真督察嚴禁永遠不准浮收分文以紓商旅報聞○榮毓等奏恭照前奉 上諭本年九月初九 皇上恭奉 慈禧端佑康頤昭豫莊誠皇太后恭送 孝貞顯皇后梓宮永遠奉安 曹祥峪 定東陵所有恭辦各事並恭備謁 陵一切事宜自應遵照敬謹預備案查同治十二年恭備 聖駕謁 陵大差因永濟庫並無存欸曾經奏請由直隸藩司撥借銀一萬兩備用卽由藩司催提遵化薊州豐潤三州縣欠解永濟庫租銀如數歸還嗣准藩司文稱以欠租歸欸辦理窒礙必須司庫開除有著欸項方能籌給經前守護大臣等奏請變通辦理由司庫地糧項下撥銀一萬兩以供要差所撥之欸歸入直隸恭辦大差正欸內開銷除因在案覆據光緒元年恭備 穆宗毅皇帝 孝哲毅皇后梓宮奉移 隆福寺光緒五年 惠陵永遠奉安並恭備謁 陵各事宜均經照案奏請由直隸藩庫地糧項下撥解銀兩以備要需各在案竊照此次恭辦 曹祥峪 定東陵永遠奉安並恭備 聖駕謁 陵寢各項急修暨石門工部應修各處備庫歲修等工用欸較煩所有 曹祥峪 定東陵永遠奉安後尙有祭祀禮節應行恭備各事似須覓爲籌

請以供動用伏查各州縣應交永濟庫租項以資支銷尋常用項已屬入不敷出現奉恭辦要差實係無款可籌奴才等詳為商酌惟有仰懇 天恩俯准照案仍由直隸藩庫撥銀二萬兩務於八月內委員解送永濟庫以備一切要需所撥銀兩仍歸司庫恭辦大差正款內開銷 上諭榮毓等奏恭備要差請撥款項一摺 東陵永濟庫額徵租銀不敷開放現在恭備 尊祥峪 定東陵永遠奉安事宜需用各款尤鉅著李鴻章即飭藩司撥銀二萬兩於八月內解到以濟要需○庚戌諭御史秦鍾簡奏各部實缺主事請定截取章程等語著吏部議奏○諭御史秦鍾簡奏各部院衙門官房固有窩藏匪類情事請飭認真稽察等語各衙門辦公之地理宜嚴肅著各部院堂官督飭司員隨時認真查察如有胥役人等在署居住不安本分容留匪人情事即行驅逐出署從嚴懲辦○御史秦鍾簡奏廣西地處邊陲前值軍務倥偬所有命盜各案州縣不暇詳辦情節輕者輒令兩造調處重者概以土匪例立決或嚴刑斃命此猶一時權宜非 國法也乃今承平已久積弊相沿地方官遇有命案聞知兇手在逃難緝即逆倫重案必先設法阻攔雖已報者或置不聞如兇手家係中貧雖自甘抵罪亦必勒令出錢了事以使夫役分肥如兇手無力吏勒令地鄰人等湊辦問有屍親不肯私了亦只將兇手規斃計免處分而已若涉盜案每勒令事主改報被竊有據實呈報者勘驗差緝一任丁役從中需索又屢傳事主及鄰右人等到案守候或吏

將其人資押甚至教唆盜供捏故反噬以爲銷案之計必使被盜者不敢報案其報案者又懼自累鄰右而不敢終訟或忿而上控則府道以上皆不准攔輿遞詞每遞一呈衙門需費自三四金至五六金不等屍親事主早受其害追控後奉批又只設爲疑詞候飭該州縣查覆是不惟中理無期而反結本官怨怒也是以忍忿含冤鮮有上控而上司亦遂以無事安之聞近來閩省秋審案只十起內外卽本年亦止十三起以六七十州縣劫搶命案層見疊出而詳辦僅有此數其被抑者不知凡幾冤氣鬱結上戾天和旱潦偏災恆必由此且小民罔知懲戒輕於犯法盜案不辦則匪徒結黨橫行易搆事端往者變逆之亂亦由姑恩釀成可爲車鑒前撫臣張樹聲查知其弊嚴飭各屬凡命盜重案限三五日一報痛懲諱飾之習一時吏治肅然乃整飭方新旋赴升任積弊終未能除以廣西一省推之他省恐亦不免相應請旨飭下廣西撫臣嚴行率屬整頓並請飭諭各省督撫一律認真查懲遇有命盜案件務令照例詳辦敢有諱匿從嚴參處庶民氣伸而強暴戢闔閭永得安靖矣上諭御史秦鍾簡奏命盜重案諱飾成風請飭疆臣認真查辦一摺據稱廣西州縣搶劫命案層見迭出地方官任意消弭詳辦者甚少被抑者不知凡幾小民含冤莫訴易滋事端等語州縣諱匿命盜案件例禁森嚴若如該御史所奏尙復成何事體舊慶裕實力整頓嚴飭屬員痛除積習此等情形他省恐亦不免並著各該督撫一體認真查察遇有命

盜案件務令照例詳辦倘有諱飾情弊卽行從嚴參處以肅吏治而卹民隱將此通諭知之○辛亥諭周恆祺奏請將交代虧短各員革職查抄一摺山東已故濱州知州王壽仁等於各該本任內虧欠正雜等欸爲數甚鉅迭經嚴催均未完解實屬玩延已故濱州知州王壽仁著卽行革職同已革臨淄縣知縣俞朝海山周恆祺查明該故員等任所寓所有無資財寄頓嚴密查抄仍將俞朝海照例監追並嚴追王壽仁家屬勒限完繳一面由周恆祺移咨浙江巡撫將各該員原籍家產一律查封備抵以重帑項○實已革廣東巡撫黃恩彤二品銜准重赴鹿鳴筵宴○王子江蘇泰興縣烈婦李季氏旌表○奕訢等奏光緒七年七月十六日內閣抄出奉 上諭內閣學士寶廷奏門禁宜嚴詳稽舊例酌議章程一摺另片奏踴躍經由未能嚴肅等語著御前大臣軍機大臣內務府大臣前鋒統領護軍統領會同妥議具奏欽此欽遵臣等公同會議查原奏內稱由於俸餉不足不能整頓前鋒護軍官兵困苦已極費用不敷值班遂難免侵吞缺額方今庫欸固屬支絀而前鋒護軍額不甚多似可量加不能合營徧加當於每日值班官兵酌加公費務使足敷值班用度不許絲毫減扣 天子禁兵非他營可比徇優不嫌偏也費用既足乃可整頓矣一節查前鋒護軍官兵 紫禁城內係鑲黃正黃正白三旗官兵輪流值班均由 景運門進班之統領督率印務章京司鑰長按照報單不時嚴察其 紫禁城外圍係正紅鑲白鑲紅正藍鑲藍五

旗官兵輪流值班均由出班之統領於閩門後率領 關左門值班之司鑰長按照報單嚴查不准一名空誤倘有空誤立即懲辦不貸其前鋒護軍官兵等雖形困苦倘無侵吞缺額等弊查 紫禁城內各門值班官兵每日例領口分銀四分兵每名每日例領口分銀三分以作鹽菜之需每月由內務府廣儲司支領官兵每名每日領米八合係由內務府官三倉支領此定例也嗣於咸豐三年十一月內務府因庫存銀兩不敷按照每銀一兩折放錢四千以致不敷用度復於同治七年七月恭奉 恩旨仍放實銀並將外圍值班之官兵一體添給口分實銀由戶部支領毋庸添給米石等因欽此欽遵在案茲據寶廷奏請酌加公費自係為體恤兵艱起見應如何酌量加增之處請飭下戶部內務府妥議具奏一原奏內稱由於事權不一不能整頓前鋒護軍統領十人每日輪值內務府復有護軍統領位均極分無所統屬互相推諉安能實力整頓且官領武職二品未甚尊崇門禁出入外而王公內而太監多所瞻顧不敢嚴禁擬特簡親信公忠王大臣二二人總司門禁諸事一節出自 聖明睿鑒非臣下所敢擬請查內務府護軍營值班官兵均歸 景運門進班之統領統轄且內務府護軍統領係三品職銜並不位均極分無所統屬一原奏內稱例載 國初定 紫禁城門密邇 宮殿百官執事人等不得擅行出入等語又凡內閣及各部院衙門堂司官以至內務府官員等均將姓名所隸旗分佐領內管領造具細冊咨送登

於版籍工匠夫役人等由本管衙門給火印腰牌書寫姓名持爲符驗又每門設紅杖各二有不報名擅入者逮之又其門籍無名及不帶腰牌混入者送刑部治罪各等語一節應卽照該學士所奏再行嚴中臣等酌議所有 禁城內各衙門各等處均有蘇拉廚役若干名及太監所管各等處他坦蘇拉廚役若干名均擬請由該管各衙門各等處速卽造就籍貫年貌姓名細冊咨行內務府全行一體發給添給腰牌並知照 景運門以歸一律嚴禁如有更換蘇拉廚役隨時知照以杜借帶腰牌冒充等弊其腰牌仍由內務府按照例限更換以憑察核一原奏內稱例又載 禁城以內凡用夫匠人等面印圖記帶領出入又民夫亦不准太監人等擅行帶入各處交納銀兩恭進 貢物祇准擡至 禁門以內掃雪步甲一體給與腰牌各等語應由內務府步軍統領衙門嚴飭所屬一體懷遵一原奏內稱嘉慶十六年軍機大臣等會議門禁所奉 聖諭尤當敬謹遵守各條一節自當恪遵 成憲各盡厥職惟因年分較遠間有未能深悉者此後惟當剴切嚴申遵守一原奏內稱各衙門引 見人員值日加班一切當差人員應由本衙門前一二日咨行值班護軍統領開明銜名數目以便察核除堂官外每員給印文一紙入門時隨本身職名交納值班章京收執察驗放入出時自取在京請 訓請 安謝 恩各員均由前一日由本衙門咨明值班護軍統領上封事者亦當自帶職名到門交納併外來請 安請 訓謝 恩人員亦當

備帶印文到門交納各條查向來各衙門過有帶領引 見及值日加班奏事之期當差官員俱隨帶各衙門印片一張註明所 奏事件及引 見人排數目呈遞奏事處各門盤察時卽以此照驗其尋常進內當差人員並未每員均給印文其京外請 安請 訓謝 恩之員亦均未備帶印文到門交納今該學士所奏係爲嚴密起見臣等詳加酌核凡進內奏事以及請 安謝 恩各員緩急不一似有難以預定者若皆非持有印文不准擅入恐致貽誤擬請除各項引見值日加班一切當差人員仍按向章飭令隨帶該衙門印片註明衙名人數察驗放入外其餘奏事以及請 安請 訓謝 恩人員均令自帶職名到門交納由值班章京察驗放入出時仍令自行取回以免牽混一原奏內稱王公官員等各有應出入之門近年則皆由 景運門 隆宗門出入一旦使依舊例不但人情不便且天未明時門多亦難稽查似可變通仍准由 景運門 隆宗門出入以便稽查臣等酌議應照該學士所奏以歸簡易一原奏內稱是年所議隨帶人數乃隨入 景運門 隆宗門當差者於僕從未爲指明查舊例太嚴後又未免太寬文職七品寬准隨帶二人擬酌中定爲除王公外一二品許帶四人文職京堂武職二品許帶二人其餘止許帶一人入 禁城門時將所帶人名冊單報明隨身帶入各依例准至之地停止如有違者照例責處一節查所有進內當差者除王公外其餘文武大臣官員僕從人等向來隨至 景運門 隆宗

門以外卽行停止其文武大員向准於所管衙門隨帶筆帖式驍騎校前鋒校護軍校藍翎長等官二人進內聽差擬請此後文武大員進內有差者卽將所帶官弁均令開寫職名到門交納以便盤察一原奏內稱太監原不准私出近來未免隨意出入甚或隨意將親屬帶入並開各有僕役隨意出入護軍統領因太監係宮中當差之人遂任其往來不敢稽察從此流弊滋多不堪設想嘉慶十八年之事可爲鑒戒欲嚴門禁必先嚴查太監否則斷不能嚴擬請 嚴飭內務府嗣後太監無故不准私出 禁城其奉有差使而出者必須給與執照以免假託令內務府添造有印執照上書有差外出四字若干張分交各宮如有差使付與執照到門驗明放出將姓名登籍歸時驗明放入不准多帶一人無執照者卽係私出拿交內務府其告假外出者則由內務府轉行 景運門傳知各門放出歸時驗明放入不准多帶一人如有循隱私放者官參處兵責革其告假則由總管太監將姓名緣由限期行知內務府仍當敬遵乾隆四年 聖諭不得過一日兩日免致在外生事 宮中遇有零星活計放匠修整當敬遵嘉慶十年聖諭毋許太監任意傳喚以昭嚴肅此輩多莠少良擅作威福時有 嚴旨飭禁護軍統領尙多顧忌否則將任其擅出擅入招引外人矣一節查太監係屬總管內務府大臣專管應由內務府大臣卽將例載並乾隆四年嘉慶十年 聖諭敬謹錄傳示太監等一體懷遵其太監告假外出應責成總管太監嚴

查如逾期不歸由總管太監奏明懲辦並令前鋒統領護軍統領嚴飭各門值班官兵凡過太監出入認真查驗如有攜帶外人抗違定制等情卽行拿獲奏明從嚴治罪倘值班官兵漫無覺察卽將值班官兵一體參辦其進匠若干名向係內務府司員帶領出入均查冊章辦理並知照 景運門以憑查核每月由內務府具奏月摺毋庸另議一原奏內稱禁城各門首當嚴查外門不嚴內門無從而嚴 蒼震門僻在東夾道易於私行出入尤當嚴查 春華門內通 中正殿出入尤易滋弊且與 長春宮相近尤當慎重似當添派章京護軍實力稽察喇嘛出入亦當一體嚴察不准閒雜人混入一節查 蒼震門向有章京一員護軍校二員護軍二十名值班看守 春華門內係 中正殿其喇嘛等當差出入應由管理中正殿大臣嚴加管束酌核辦理一原奏內稱門禁廢弛已久各處器械未必堅利當一律添換務求適用勿徒壯觀例有鳥鎗之處可否添給洋鎗一節等詳查 紫禁城四門均設有鳥鎗足資利器洋鎗不合舊制未便添設其餘器械隨時查驗如有殘傷之處咨行武備院立卽更換惟將鳥鎗什物鉛丸火藥等項儲備齊全以資守備一原奏內稱六班王公及文武大臣職任本重近日已成具文進六班與補進王公皆有看守合符之責當擇老成持重與年雖少而精明幹練者以昭慎重並令 景運門每日進各處值班官員銜名兵丁旗分額數開單行知值班王公文武大臣以憑核辦一節等詳查王公皆

有看守合符之責其任本重文武大臣皆有查更之例足資慎重其禁城值班等事均應遵照舊例辦理一原奏內稱例又載造辦處及內務府衙門人役衆多總管內務府大臣每日各派司員二人稽察立法甚善近亦成具文當中明潔遵一節上等酌議仍令內務府每日選派妥實司員兩人認真稽察再附片內稱例載聖駕出入及陞殿上朝官員隨從人役有喧嘩擁擠者拿交治罪又凡過壇廟祭祀及陞殿之日各執事官兵人等各令該管官員等統率而進告知人數一併放入各等語近來每逢前期太廟行禮午門外閒雜人等甚多殊屬不成事體請嚴飭護軍統領嗣後凡過聖駕出宮務當督率官兵清蹕不准閒雜人等攪混潛藏一節上等酌議令該護軍統領等加派官兵督率管轄以昭慎重至所稱執持儀仗人等因費用不足多有替代請飭所司嚴查不可輕招閒雜人等替代天顏咫尺諸當慎重費用不足亦當少加一節應由該管衙門酌核辦理又奏上等恭祭禁門以外密邇街市欲治其內先嚴於外擬請飭下步軍統領出示曉諭街市居民及商賈人等一概不准擅入禁城尋親覓友售賣貨物等情一經拿獲送部從重治罪並加派弁兵密為巡察則居民商賈不敢入內經營禁門自然安謐其值班官兵易於管轄上諭恭親王等奏遵議門禁章程一摺禁城重地理宜嚴肅迭經諭令認真稽查乃各該官兵日久生懈視為具文實堪痛恨此次所議章程或申明舊例或斟

酌變通所傳尙屬詳盡各該管大臣務當確遵辦理督飭所屬實力奉行不得稍涉因循至太監出入著總管內務府大臣務令總管太監認真嚴查如有抗違定制等情並著嚴行懲辦決不寬貸懷之其所請酌加值班官兵公費一節著戶部內務府妥議具奏另片奏請飭禁商賈人等擅入禁城等語商賈人等擅入禁城於門禁大有關係著步軍統領衙門嚴行曉示如果有人擅入一經拿獲卽行送部從重治罪○癸丑 上詣 觀德殿 孝貞顯皇后几筵前行禮○諭景瑞奏恭辦要差援案請撥款項一摺東陵永瀆等庫款項支絀現在恭辦 曹祥峪 定東陵永遠泰安沿途應行預備各事宜需款甚亟著李鴻章卽飭藩司不拘何款撥銀一萬六千兩於八月初間派員解交該衙門兌收以備支用○甲寅予江蘇昭文縣貢女胡吳氏長洲縣貢女胡朱氏旌表○李明墀奏江華縣土猪滋事一案經臣奏奉諭旨飭將原定章程詳加酌度妥議具奏務令民猪永弭弊端以靖地方等因欽此仰見 皇太后 皇上綏靖邊圉一視同仁之至意欽此臣維法以積久而生弊制貴因時爲變通查乾隆二十四年擬猪章程所載猪產准照原價贖回後再擅賣許猪人首告將逐斷還不追原價等語揆度情事自係彼時客民不多而所買田山年分又淺故准其照價贖回之後復特爲此厲禁俾民不敢貪近利而貽後災然不能永遠格遵彼此仍然冒禁竄緣猪藉客以通行無客藉猪以資蓄積兩相需卽兩相顧故雖有出賣

之嚴禁輒復私易名目改爲永當永批微論地方官無從聞知卽知之而律設大法禮順人情亦自有不能概令強從之勢故道光十三年續定條約卽多有變通今距乾隆定章之時業經一百餘年忽欲會新章而復照例向收田產盡逐客民無論酌理準情均覺不順就令刑驅勢迫亦屬難行然不趁此事定之初懲前毖後規畫久長又慮數十年後將產悉成客產而猶人之貧苦益深客籍多於猶籍而客民根蒂益固馴至愚猶含忍受欺瞞猶忿生事厯歲經時決裂更不可收拾臣於上年冬札飭署永州府知府周舜候補知府麻維緒長沙府同知李必昌將乾隆二十四年與道光十三年兩次撫猶章程斟酌今昔情形悉心妥議其有積久流弊而不便於民猶者去其太甚存其大綱並令傳集明理客猶總目積誠勸誠告以必應如何酌改方能日久相安卽所改或有未宜併許當時直陳復商吏定務使家喻戶曉彼此信服樂從方能永杜爭端與民更始嗣據實議撫猶新章六條稟復前來臣詳加察核尙屬平允惟事關永遠遵守不厭再四推求臣復批飭周舜會同留防猶山之統帶教新營提督蘇元春再將所議章程按戶傳諭就察民猶情形是否情願遵議再行稟臣核定並經附片奏明在案茲據周舜等稟稱此次新議撫猶章程六條先與該客猶總目開誠布公反覆推論續經親歷九冲沿途傳集散戶明白宣示均各翕然誠服情願具結遵議並以推廣學額一條幸得則身士林同沐 聖朝文教羣情尤爲鼓舞深悔從前

誤信痞猾構煽自爲化外頑氓竟有言之泣下者惟查九冲皆山岡或新墾成田半皆磽瘠致未丈畝升科僅有大半洞豁田畝照例納糧與按賦立額之例稍有未符等情前來臣伏思田賦關係國家正供以多寡而定學額以獎食毛踐土之氓而自咸豐以來軍興籌餉各直省督撫臣奏請加廣學額均荷諭旨允准立沛恩施並未以田賦爲準則因查江華縣九冲豁山田賦不敷請立學額之例而現在籌辦撫犒冀以並誦之風化其獷野之性且該縣涵濡文教二百餘年實亦不乏讀書之選同股上進之忱苦於地利有限致令向隅情殊可憫合無仰懇天恩特降諭旨微給江華縣九冲犒童新籍歲科試學額一名以廣教化而資鼓舞出自格外鴻施至此外所議各條臣悉心詳加酌度衡情準理因時制宜並無絲毫偏重可冀永遠遵行既據紳民犒均已情願遵依自應俯如所請謹繕摺進呈御覽祇候宸定飭下勒碑欽遵即將兩次撫犒章程碑一律刪除一以此次新章爲定上諭李明琛奏遵議撫犒新章並請加九冲新籍學額一摺湖北江華縣民犒難處前經兩次立定章程遵行已久惟今昔情形不同自應因時制宜斟酌變通以期允協茲據李明琛派員親歷查勘酌議撫犒章程六條詳加披閱均屬平允著卽刊立新碑俾得永遠遵守嗣後民犒交涉各事均照此次新章辦理以昭畫一務令民犒相安毋端永弭至九冲新籍並著加恩准加學額一名該犒戶益當感恩向化毋負朝廷教育成全

至意○乙卯以寶霖兼署盛京刑部侍郎○命景壽爲崇文門正監督志和爲副監督○督辦寶百塔等處事宜吳大澂奏領解軍火委員稽差逼勒民財請將花翎雲騎尉永平革職歸案實訊從嚴懲辦以爲不恤民瘼者戒得 旨如所請行○奕訢等奏 臣等於本年閏七月初一日具奏請將校勘 列聖 御製詩文集 列聖 聖訓出力人員俯准酌擬保獎奉 旨依議欽此伏查 列聖 御製詩文集 列聖 聖訓卷帙宏富此次先後奉 旨刷印 臣等督飭方略館提調敬謹辦理並派軍機章京分司校勘該章京等逐日輪往印書處校勘書至二千餘卷之多時計五年之久詳慎將事尙無貽誤供事等隨同辦理均不無微勞足錄 臣等詳加酌核分別議獎於鼓勵勞績之中仍寓慎重名器之意謹分繕清單恭呈 御覽可否仰懇 天恩准照所請給獎以昭激勸得 旨允行○林肇元奏 臣准前撫 臣岑毓英咨光緒七年四月二十五日承准軍機大臣字寄光緒七年四月初八日奉 上諭貴州石阡府知府崑玉著岑毓英林肇元悉心察看如竟不能勝任卽行據實參奏毋稍遷就將此諭知岑毓英並傳諭林肇元知之欽此遵 旨寄信前來等因轉咨到 臣前撫 臣岑毓英未及查辦卸事馳赴福建巡撫新任自應由 臣欽遵辦理 臣查該員崑玉前署繁平府任內勵精圖治撫綏得宜於各屬應辦事件亦無不督同經畫諸臻妥善迨上年飭回石阡府本任初亦振作有爲照常任事嗣患潮濕之症手足未能得力以致辦公

稍形竭蹶尙無貽誤今該員業已告病另行題報報聞○丙辰予江蘇震澤縣孝子曹吳熊旌表○何瑞
等奏福建光澤等縣被水沖毀民房淹斃人口分別委勘議恤得旨覽奏光澤等縣被水情形殊深軫
念卽著該督撫飭屬勘明妥爲撫恤毋任失所○丁巳予四川資州孝子韓克明等旌表○戊午以彭玉
麟署兩江總督兼署通商事務大臣○銘安等奏奴才等前因整頓吏治業經奏准將吉林理事同通三
廳統歸外補並請由部揀發滿漢曾任實缺正途同通州縣六員來吉差委各在案現在請添屬縣各缺
亦經奉部議准伏念新設各缺地處邊陲民多初集一切政務有創無因固非夙昔通達文理講求吏治
之員治巨理繁難期勝任其舊設理事三廳或地當衝要政務殷煩或雜處蒙民撫綏匪易兼以山深林
密伏莽滋多闢地放荒滿民頗衆今非昔比治理維艱惟在簡賢而任能可期化民而成俗前荷天恩
准奴才等因地制宜整頓吏治自應請將新舊州縣各缺統照奉天章程由部揀發曾任實缺正途及奏留
各員內酌量試署請補以期聲教振興政體畫一惟查省理事同通各缺吏部仍照例將筆帖式應升理
事同通人員請旨簡發來吉差遣查此項人員例由各部院筆帖式推升奴才等前曾奏陳該筆帖式
等在署當差僅効奔走之理多不通達吏治素未講求民社驟膺茫無所措恃丁胥爲耳目倚幕友爲腹
心傀儡登場隨人喜怒公務之廢弛頑民之梗化推原其故職此之由奴才等於各項揀發人員內悉心

考察試以事功其曾任實缺正途各員除核實甄別另片奏 開外所有留省補用各員尙能講求利弊之源足挽因循之習較之各部院筆帖式優劣迥別亦非謂各部院揀發人員全無可用但初爲民牧之司卽加以煩難之任辦公竭蹶終覺利少弊多查省民官極少新舊各缺均稱難治現當整飭吏治撫輯地方揀發各官來一員卽須得一員之用與其徒沿襲例難以賢才僅見之備員何若統照新章永除苟且相安之陋習在奴才等既可位置得當在該員等亦免坐困向隅實於員缺地方兩有裨益現在由筆帖式揀發以同通補用者尙有毓綬毓衡二員查毓綬人頗勤謹前經委署吉林廳事雖辦公尙無貽誤而措置未能裕如吉林省新舊煩要各缺均非該員所能勝任未便遷就留省補用相應請 旨將候補同知通判毓綬歸部仍以本班照例選用其毓衡一員於本年七月甫經到省自應隨時察看試以差務能否有爲另行甄別斷不敢瞻徇情面致誤地方奴才等擬請嗣後吉林各廳州縣員缺均仿照奉天章程奏請由部揀發曾任實缺正途人員來吉差遣不分滿漢酌量補用其由各部院筆帖式揀發之例合無仰懇 天恩飭下吏部永遠停止庶幾因地擇人最能授任新荒可期漸闢舊弊不至復滋以仰副 聖主察吏安民勵精圖治之至意下吏部議奏○己未額魯特領隊大臣特爾慶阿以病免

光緒四十三

臣朱壽朋敬編

臣潘鴻鼎恭校

八月庚申朔夕 月於西郊道職即恭代行禮○岑毓英奏據省中辦事處緒擬即渡查勘防務報聞○岐元等奏朝鮮貢使洪佑昌中途被賊拒傷搶去銀兩請將防護不力之小黑山界官騎騎校恩魁新民廳撫民同知廉隅先行摘去頂戴勒限三個月嚴緝賊務務獲得 旨恩魁廉隅均著先行摘去頂戴勒限嚴緝○李肇錫奏致治之道莫要於安民安民之法莫先於擇吏牧令之賢否民生之休戚繫焉故欲謀保聚重撫綏必自慎選牧令始自軍興籌餉以來流品之雜已極矣我 皇太后 皇上洞悉其弊於庫款支絀之時毅然停止捐輸薄海臣民無不仰頌 聖明共識端本澄源之至意而臣竊以爲捐輸之停止所以肅吏治也吏治之肅所以期澤之下逮乎民也夫親民之官孰有重於州縣乎數十年來各省捐納需次人員固已不少近則領照到省者又復紛至沓來此中原不乏奇傑之士而要其得人之盛未必過於正途而弊之中於地方者則惟州縣爲尤甚約舉之蓋有二焉溯自捐例屢次減成殷實之家挾資數千金卽已儼然居民上彼其積累之餘曾無損於毫末第以仕途爲光寵而已而榮奢成

習幸處脂膏則肆其揮霍不幸而缺分稍瘠勢必至於虧帑剝民此弊在有餘者也而竭蹶集資之流又往往日暮途窮視一官爲取償之計一旦履任計毋取贏不充其幾案而不止縱或終以墨敗而寬典可邀亦僅降調耳視職耳厚資坐擁曾不失爲富民此弊在不足者也臣不敢謂正途人員之果無此弊而我朝科目取士歷久不廢事例偶開因時輒止此其爲經爲權孰輕孰重固已昭然可睹矣夫既准其捐納於前自不能概置不用使才俊有向隅之歎而擇其尤要者裁制而損益之固未嘗無術也伏查吏部奏定章程各省道府部選缺出本省題奏咨報所開各缺俟本省留補二次卽應咨部銓選一次以三缺爲一週不得參差撓越等語蓋恐選補二項消涉偏枯故以限制爲疏通法至善也臣請竊仿此意各省州縣缺出無論煩簡留補部選每缺用正途人員二次始開用捐納人員補選如再無人始准以捐納人員借補過班若捐納應補選班無人亦如之其法於兩途均屬持平毫無軒輊特選補之缺正途較多一次積計之似屬稍優不知行之十數年捐納日見其少而正途如故再歷數十年將並無捐納而惟存正途得缺之多於捐納初無所爲滯礙也擬請飭下吏部詳核定議除軍功人員及丞倅簿尉無預地方之責者仍照舊章銓補外此後州縣缺出可否如臣所擬變通辦理務祈於馭吏之中寓救弊之意況在瘡痍後元氣宜培司牧得人而後小民蒙福時政急務無逾於此上諭御史李燧錫奏州縣宜多

用正途請飭妥議章程並特旨內用人員選補班次請酌量變通各摺片著吏部議奏○辛酉 上詣
觀德殿 孝貞顯皇后几筵前行禮○癸亥諭刑部奏明審人犯呼冤請派大臣會訊一摺本年朝審臨
時呼冤之楊樹田卽楊二一犯著派大學士會同刑部再行覆訊具奏○甲子諭軍機大臣等禮部奏請
飭催朝鮮香貢趕緊解京一摺據稱朝鮮國恭進香貢已於七月間詢國使臣照例將貢物交盛京將軍
派員解送迄今尙未投到請飭趕緊解送等語現距九月初九日 孝貞顯皇后梓宮奉移日期甚近典
禮攸關豈容耽延遲誤著恩福松林飭令解送香貢委員趕緊解送毋稍遲延並著李鴻章童華游百川
謙德卽行派員迎接妥速解京以昭敬慎而免貽誤將此諭知童華游百川並諭令李鴻章恩福松林謙
德知之○諭前據御史邵和誠奏參福建道員葉永元等各款並革員舒之翰潛往福建出入將軍衙門
倚勢招搖等情當諭令何璟岑毓英查辦茲據該督撫查明具奏福建督糧道葉永元鹽法道翁學本候
補道盛世豐漳州府知府毓璋據該督撫查明並無劣跡仍著隨時留心查看毋稍迴護龍巖州知州聯
興才具平常尙無貪婪實跡惟信用家丁精力漸衰著勒令休致署晉江縣知縣調補鳳山縣知縣張星
鐸操守尙好並無賈妓爲妾情事惟不免恃才身體亦弱著撤任查看福安縣知縣徐承禧前在長樂縣
任內赴鄉催糧有村民聚眾抗糧奪犯並無毆官情事現任福州縣事尙無劣跡著始終具轍卽行展參

臺灣縣知縣潘慶辰染患痰疾辦事頗煩家丁因而作弊被參藉修神廟苛罰勒捐一事應行澈底查究
著先行革職審訊仍著該督撫懷遵前有破除情面認真整頓以肅吏治已革道員舒之翰據稱查明該
革員於穆圖營未到任以前經李鴻章差往福建穆圖營並未容留亦無逗留干預各情該革員業已銷
差著毋庸置議○諭昨據刑部奏竊案人犯楊樹田即楊二臨時呼冤當有旨派大學士會同刑部再行
覆訊茲據給事中戈靖奏請將此案飭交刑部會同都察院研鞫一摺著仍交大學士會同刑部悉心審
訊具奏總期無枉無縱以成信讞○諭給事中戈靖奏戶部廣東司書吏冒領恤銀一案雖經該司郎中
額勒精額查出奏交刑部歸案辦理惟辦公草率請撤去差使等語著戶部堂官查明覆奏○諭給事中
戈靖奏鑲白旗蒙古佐領崇惠恃伊弟崇林充當理藩院蒙古庫倫領催勾通理藩院書吏高振廷等與
朱慶雲朋比為奸數年來冒領蒙古卹賞銀不下數萬請清查究辦等語事關官吏舞弊冒領卹賞亟應
澈底查究著理藩院堂官查明覆奏○乙丑荊州將軍景燾卒予卹如例並准入城治喪子福勒洪額賞
給主事○以御驛圈當差朱順驥馬闖入東長安門交刑部從重治罪○丁卯祭 先師孔子廟遣靈桂
行禮○戊辰祭 社 稷壇遣世鐸恭代行禮○世鐸等奏伏讀七月十一日 上諭本年九月初九朕
奉 慈禧端佑康頤昭豫莊誠皇太后恭送 孝貞顯皇后梓宮奉移 曹祥峪 定東陵永遠奉安等

因欽此仰見 皇上 聖孝純誠盡哀盡禮之至意 臣等局敢妄行瀆請惟思 皇太后 慈躬正報大安氣體尚未復元飲食起居正資靜攝九月中旬節交冬令天氣已寒若往返長途復加傷感於 節勞頤養之道均不相宜論者或謂 皇太后未可遽勞 皇上自當恭送庶幾事出兩全第念 聖主尙在冲齡隨侍 慈闈事事皆資調護自 入承大統以來晨昏相依未嘗有一日之間若 乘輿遠出必致慈懷屈系斯夕難安仰維 皇太后 訓政勤勞一身寶繫 宗社之重況 孝貞顯皇后不幸棄天下臣民值此時事多艱軍國萬幾專賴 璇宮裁決設因遽注過切致於頤養之道有疏益將上歉宸衷下殷民望知 孝貞顯皇后在 天靈爽必將恹然不安卽撻諸 列祖 列宗佑啟垂裕 神靈亦恐無以仰慰伏思 天子之孝以仰承 付託爲先經云禮時爲大又云禮以義起勢之所阻情之所迫卽爲時之所限義之所生臣等雖甚愚昧亦知仰體 皇太后悲思 孝貞顯皇后之至誠 皇上慎終追遠之孺惻何敢導 聖人以闕禮之愆特以熟念 皇太后與 皇上既有不能遽禮之情 宗社萬世之奠安與 山陵一時之典禮實有相較尤重之義所關太鉅不敢緘默不言惟於無可如何之時爲酌經從權之請伏查康熙二年 世祖章皇帝梓宮永違奉安諸王大臣引禮止 駕遽送復經 孝莊文皇后懿旨諄切 聖祖仁皇帝勉從 慈命未赴 山陵禮有經權固天下後世所共諒臣等公同商

議惟有籲懇 皇太后 皇上仰祈 成憲勉抑哀忱停止 躬送以上慰 孝與顯皇后在 天之靈
而副中外臣民之望如蒙 俯允所請其一切應行典禮請 旨飭下各該衙門敬謹妥爲辦理等不
勝迫切屏營待 命之主 上諭本年九月初九日朕奉 慈禧端佑康頤昭豫莊誠皇太后恭送 孝
貞顯皇后梓宮奉移 普祥峪 定東陵永遠奉安業經降旨令各該衙門敬謹預備嗣經大學士全慶
尙書萬青藜志和毛昶熙翰林院侍講學士鈕玉庚周德潤侍講高萬鵬國子監司業王邦璽御史鄭鴻
元李士彬孫紀雲蕭韶丁鶴年先後陳奏或稱 慈輿未可遽涉郊坰或謂朕亦未可暫離左右本日復
據王大臣等合詞籲懇奏稱 皇太后訓政勤勞實係 宗社之重現在市報大安尙未復元往返長途
復加傷感於 節勞調攝均非所宜又以朕依侍 慈闈事事仰蒙調護若暫疏定省必致昕夕 慮懷
亦非頤養之道謹遵康熙二年 聖祖仁皇帝成憲停止躬送等語情詞胞摯出於至誠披覽之餘曷勝
悽愴仰惟 皇太后聖躬甫臻康豫衝寒就道時歷旬餘誠非所以資保衛而昭慎重謹據王大臣等所
奏竭誠籲請仰蒙 垂鑒微忱俯允停止往送朕受 孝貞顯皇后顧復深恩 昊天罔極值此 泰安
大典不克盡哀盡禮此心何以自安茲奉 皇太后懿旨皇帝尙在沖齡衝哀遽出懸系實深諸王大臣
等所陳係仰體萬不得已之苦衷爲此酌經從權之請尙其以 付託爲重勉循 成憲俯順羣情允如

所請欽此 慈命諄切敢不祗遵敬念 靈輿在道永奠 山陵未獲躬親大事夙夜兢兢莫敢怠何極將來詎吉舉行恭謁典禮再行侍奉 皇太后敬詣山陵虔申誠悃此次應派近支王公恭代行禮及一切應行典禮著各該衙門詳稽例案酌議具奏○以木格署鑲黃旗蒙古都統○以祥亨爲荊州將軍謙福爲察哈爾都統奕榕爲寧夏副都統○樓譽奏六月十六日恭奉 上諭澄敘官方察吏實爲急務各省督撫考核屬員率多虛應故事不足以示勸懲至冗員過多亟應照章甄別將庸劣各員隨時裁汰毋任日久濫竽各等因欽此仰見 皇太后 皇上整飭吏治之至意然數月來各省督撫尙無應者臣謹以吏治之弊約略陳之州縣爲民生之根本州縣得其人則百姓安州縣不得其人則百姓擾近來之最巧而最害者以同通署理州縣爲首而老幕盤踞次之應迴避不迴避次之在服官省分置買田產與民爭利又次之 朝廷設官各有等差同通州縣本係四班毋庸混雜咸豐軍興以後人少不得不借用現在實在任及候補州縣每省數百員何至無才各督撫且請停分發如何再可使越查同知五品通判六品爲州縣之升階以同通署州縣升降之權倒置而得之者以爲喜與之者以爲恩是誠巧宦之尤者矣保舉同通類皆情面一二次列名居然實官捐納同通所費不過數百金亦居然實官到省後自計鑽營無微不至督撫以爲能使署州縣事權在手威福自擅不知地方之利弊惟求私案之充盈稍分其肥以結

督撫之幕友官親遂相交譽故小民恨如切齒而督撫猶以爲能員也前奉部章四缺得一此風稍熄然嚴其得缺轉運其貪婪輪委既艱旅食益大一旦署事不剝盡脂膏不止而地方更不可問矣則何如絕其署理州縣之路之爲無弊也況同通自有同通之缺州縣宜歸州縣之班於國家分職初意亦屬相合應請 特旨飭下各省督撫以後各用本班現在保舉捐納同通不由州縣班而署州縣一概先行撤任勒令補交州縣本班實銀以懲取巧以定名分庶州縣有專司不致付民生於不問矣幕友本佐政事而久事盤踞則弊端百出近來各省督撫司道各衙門沿用幕友往往老於其位歷數任而不更遂視爲固有者公事付之子弟已則逍遙事外聚賭博肆招搖受規禮縱訟辭甚且時行賄賂廣通聲氣幕友本係寒士何以便成巨富則其平日之貪廉自見督撫司道之明察者亦或知之而根深蒂固莫可動搖亦遂任之迨至決裂即使驅逐亦貽害不淺則何如先事豫防之爲得也應請 旨飭下各該衙門嚴加查訪不得沿用慣弊老幕斯盤踞之術竊而政亦可理矣至於迴避人員例定甚嚴近來亦視爲具文前經御史奏請查辦雲貴二省臣聞他省亦間有之有父兄爲司道幕友而子弟爲候補州縣者有父兄爲候補道府而子弟候補同通州縣者至兩浙兩廣兩淮各有鹽務省分更多應行迴避人員在鹽務雖不理民事而其互相瞻徇則一也應請 旨飭下各省一體查辦勒令迴避則情面庶可稍戢矣至服官省分例

不准置買田產開設店肆乃近來各省官員無不犯此禁其已罷官者猶可言也不謂督撫方畀以事權而產業即因之日廣微論有玷官箴卽此孜孜爭利之心可決其居官之不廉其始亦畏人知假他名以混之及至久而坦然不疑相率效尤幾視之爲當然者應請 旨飭下各督撫認真查辦不得以空言塞責若猶粉飾當予嚴懲 上諭給事中樓澤善奏敬陳管見一摺各省督撫司道衙門應用幕友自當慎選品行端方明習吏事者以資助理若如所奏竟有日久盤踞聚賭招搖各情甚至肆行賄賂賄迫聲氣於吏治大有關係著各督撫嚴行查察如有似此劣幕立即驅逐並嚴飭司道等一體訪查不准徇情遷就致滋弊竇至服官省分置買田產例禁嚴重著各督撫認真查辦毋稍徇隱其所請將同通州縣各用本班及各省迴避人員一體查辦兩條著該部議奏○己巳予山東蘭山縣烈婦姚任氏安徽霍邱縣孝婦江盛氏旌表○庚午中巴條約成其文曰 大清國 大皇帝大巴西國大皇帝切願敦睦之誼俾兩國均獲利益公訂和好通商行船條約是以 大清國 大皇帝特派 欽差全權大臣太子太傅文華殿大學士兵部尚書都察院右都御史直隸總督一等肅毅伯加騎都尉世職李大巴西國大皇帝特派欽差全權內大臣勳賜佩帶羅斯並土爾其墨基地噶各等寶星略各將所奉上諭互相閱看均屬妥善卽經議定條款如左 第一款 嗣後 大清國與大巴西國暨厥人民永存和好永敦友誼彼

此皆可前往僑居須由本人自願各種保護身家財產並一體與相待最優之國民人同獲恩施利益

第二款 此次定約以便嗣後往來通好 大清國 大皇帝可派使臣駐劄巴國京都大巴西國大皇

帝亦可遣使臣駐劄中國京都各准兩國使臣並眷屬隨員人等前往彼此京城或常川居住或隨時往

來一遵本國之 旨兩國使臣在公署時享種種恩施與待最優之國使臣無異 第三款 兩國於

彼此通商口岸設立總領事領事副領事並署領事等官均聽其便惟此等官員必須奉到駐劄之國批

准文憑方得視事其臨時彼此交發文憑均無費用所派領事官必須真正官員不得以商人兼充亦不

得兼作貿易各口倘未設領事官或請別國領事兼代亦不得以商人兼充或即由地方官照現定條約

代辦兩國領事官享種種恩施與彼此所待最優之國領事官無異至商民交涉事件有與本地官民

齟齬者領事官均不得任意爭執如領事官辦事不合彼此均可按照公例即將批准文憑追回 第四

款 中國人民在巴國如安本分但能不違巴國律例章程無論何處任便游歷巴國人民亦准前往中

國內地游歷須由領事官照會關道請領印照前往回日繳銷其印照繕寫中巴兩國文字所經過地方

如飭交出執照即應隨時呈驗該民僱人僱船僱車裝運行李不得攔阻如其照內有誤以及查出沿途

或有不法情事即送交就近領事官查辦惟於途中止可拘禁不得陵虐如在通商各口出外游玩者地

在百里之中期在五日之前可毋庸請照至於船上諸色人等不在此例如有上岸應由地方官會同領事官另定章程妥爲彈壓 第五款 中國民人准赴別國民人所至之巴國通商各處往來運貨貿易巴國民人准赴別國民人所至之中國通商各口往來運貨貿易嗣後兩國如有優待他國利益之處係出於甘讓立有專條互相酬報者彼此須將互相酬報之專條或互訂之專章一體遵守方准同沾優待他國之利益 第六款 兩國商人商船凡在此國通商口岸即應遵從此國與各國原議續議通行商務章程辦理至進出口稅則亦不能較相待最優之國或有增加 第七款 兩國兵船可以赴別國兵船所至口岸彼此接待與相待最優之國無異一切買取食物烟煤甜水修理船隻各無阻礙該兵船進出口一切稅鈔俱不輸納巴國兵船管駕官中國地方官與之平行相待 第八款 兩國商船准在彼此通商各口往來運貨貿易彼此相待與別國商船無異倘兩國船隻遇有天災在彼此沿海地方收口者該處官員自當設法相幫所有未遭失險之貨物如不欲出售自應不納稅銀遇險船隻兩國均與待別國船隻一律 第九款 巴國人民在中國遇有控告華民事件皆應先稟領事官查明根由先行勸慰使不成訟華民有赴領事官控告巴國民在中國者領事官亦應一體勸慰問有不能聽勸者無論原告或係華民或係巴民皆專由被告所屬之官員公平訊斷 第十款 巴國民人在中國有被華民違

例相欺准地方官查拏照例審辦華民有被巴國人在中國違例相欺巴國官亦按例查拏究治總之兩國民人交涉財產犯罪各案俱由被告者所屬之官員專行審斷各照本國律例定罪惟遭欠案件應由欠戶所屬之官員勉力設法使其償還竊盜案件應照被告者之國律例辦理兩國官員均不能代償至中國民人遇有本身犯案或牽涉被控凡在巴人公館寓所行棧及商船隱匿者由地方官一面知照領事官一面立即派差協同設法拘拏不得庇縱指留 第十一欸 巴國屬民在中國有自相控告案件不論人產皆歸巴國官查辦設與別國有事在中國涉訟應由巴國領事與該國領事辦理以上案內如牽涉中國人仍應按前兩欸辦理若將來中國與各國另行議立中西交涉公律巴國亦應照辦 第十二欸 凡兩國船隻駛至通商口岸本船諸色人等如有上岸滋事各照兩國常例拏辦至巴國船隻在中國沿海通商口岸有與本地船隻相碰互控情事可由被告所屬之官員查照各國碰船現行章程審理倘未甘服應聽原告所屬之官員照會審理之員秉公復審核斷了結 第十三欸 中國民人在巴國有控告事件聽其至審院控告應得名分與巴國民人及與相待最優之國民人無異 第十四欸 中國與巴國彼此商定中國商民不准販運洋藥入巴國通商口岸巴國商民亦不准販運洋藥入中國通商口岸並有此口運往彼口亦不准作一切買賣洋藥之貿易所有兩國商民無論僱用本國船別國

船及本國船爲別國商民僱用販運洋藥者均由各本國自行永遠禁止此係兩國公同商定不得引一體均沾之條請解 第十五款 此次所定條約係用中國文巴西文法國文各四紙業經公同譯校各相符合毫無訛誤嗣後如有彼此不明之處除各用本國文字外兼以法文爲正 第十六款 日後兩國若於現議條款內有欲行變通之處應俟自互換條約之日起至滿十年爲止先期六個月彼此備文知照如何酌量更改方可再行籌議若未曾先期聲明仍照此次議定條約辦理 第十七款 今將以上議定條約由兩國 欽派全權大臣先行畫押蓋印用昭憑信一俟兩國 御筆批准或在上海或在天津彼此卽行互換後再刊刻通行使兩國官民咸知遵守○湖南提督鮑超奏請於湖南及四川夔州建立靈軍昭忠祠得 旨著各該督撫查照奏案卽行籌款辦理○李瀚章奏湖北潛江縣大澗口支河爲分洩襄水要道沔陽劣紳勾串居民於澗口內河何家垸地方違禁築壩值汛漲衝決延及楊家塢新挖月堤致下游各處居民猝不及防受害較重請將肇事之副將銜補用參將王子芳革職示儆得 旨如所請行○李鴻章奏 臣於光緒六年八月初一日遵 旨與巴西使臣喀拉多等議立通商條約彼此畫押鈐印嗣因禁販鴉片一節尚未列入約內喀拉多旋接該國電報商請添作條款並欲將原約少加更改以期兩國有益屢次會議及各條酌改字句情形經 臣於本年閏七月初八日照鈔約稿詳細奏明

在案喀拉多於八月初二日由滬回津函稱接到本國外部電覆謂此次所改各節可以允行卽將新約
畫押嗣據照會禁販鴉片添作條款現已重繕約本的酌改妥協請定期彼此畫押蓋印應將前次之約作
爲廢紙等因臣卽照覆以中國與各國已訂之約向不能於未換以前另議刪改今因於兩國有益且爲
通商和好起見通融辦理並聲明倘非該國允將禁販鴉片添入條款臣亦未便曲徇所請等語以備將
來他國或有援引可以設詞抵制遂訂於八月十一日臣督同署理津海關道周馥等會同巴西使臣喀
拉多在公所畫押蓋印卽將原約作爲廢紙其改定條約仍配用中國文巴西文法國文各四紙校對無
訛彼此各存正副本二分以便屆時互換奏入報聞○岐元等奏圍場前撥官兵二百名遇缺改由圍地
旗丁挑放以歸簡易下兵部知之○清安等奏科城旗綠戍守官兵月支鹽糧不敷餬口援案懇 恩加
增鹽菜銀兩以濟艱窘下部議奏○辛未以九月初九日奉移 孝貞顯皇后梓宮派恩麟梅啟熙恭送
○紫兆棠奏請調直隸試用道呂耀斗到閩充船政提調以資臂助允之○壬申命崇福來京以龍際雲
爲湖南布政使蒯德標爲湖北按察使○命李明墀來京調涂宗瀛爲湖南巡撫○以李鶴年爲河南巡
撫勒方琦爲河東河道總督林肇元爲貴州巡撫沈應奎爲貴州布政使葉伯英爲陝西按察使○諭戶
部奏遵旨查明覆奏一摺戶部郎中額勒精額既據該堂官查明該員平日遇事整頓一切差使均能實

心經理至書吏冒領卹賞一案該員查出卽自行檢舉請將人犯送交刑部辦理並非草率給事中戈靖
所請將該員撤去差使之處著毋庸議○衛榮光奏管邊之歸綏包頭控扼草地毗連大青山暨後山一
帶形勢遼闊南抵殺虎口六百餘里西逾綏金八百餘里東接得勝口亦數百里均與回疆蒙部犬牙相
錯溯自卓興以來征調四出官則來去無時勇則招遣莫定其中游惰之徒竄緣伏匿遂恃此爲遁逃洲
嶺又其地多屬蒙古游牧近年赴口開墾者往往謀搆爭利仇殺相尋日久失業亦遂勾結匪類肆其擾
害從前因卓勝軍扼紮庫市川包頭一帶爲之屏蔽自三年卓軍西去卽經前撫臣曾國荃招募湘毅軍
填紮該處地方賴以安靜上秋湘軍東調雖將樹軍裁剩右營擇要布置而馬步四旗礮隊一哨爲數僅
止一千二百餘人責令分巡千餘里之防此往彼來疲於奔命以故上冬與本年四五月間邊口地方卽
有竊然不靖之勢迭據大同鎮張樹屏以地廣兵單難於兼顧非添派防營不足以資震懾等情咨商前
來臣查口外地方荒野非如內地有村鎮城池可以阻遏亦不如內地有墩汛兵役可以稽查而且居無
四隣人皆野處卽白晝劫奪何所忌畏況游惰各匪積年混跡其間此拿彼竄習爲故常弱食強吞已非
一日若不有犯卽懲至此輩賊膽日肆馴至如奉天吉林馬賊大肆騷張其滋擾蒙古生計固屬可虞而
嘯聚日多當此邊陲未靖之秋尤恐養成巨患是添派防營一事實屬當務之急所難者屢飢之後司庫

支絀萬分既不敢率准增隨又未便置爲緩圖再四思維惟有就大同額設馬兵揀派七百八十名查照
晉省練軍章程編作前後左右中五旗由張樹屏派員管帶俟成軍後擬飭左右中三旗分紮口外三會
必嚴察素齊大余太等處前後兩旗擬飭分紮口內之陽高岱岳等處劃定汛段聯絡巡防藉輔樹軍力
所未逮至所以專練馬隊而不挑練步隊者蓋以平原曠野必以逐捕爲先如教練得法將來樹軍裁撤
有此項馬隊馳驅奮擊既可張邊鄙聲威亦足開綠營風氣似於邊防營務兩有神益下部知之○癸酉
左宗棠因病奏請開缺不允予假兩月調理○諭御史李郁華奏道府等官起復吏部知照軍機處及軍
機處進單請畫一辦理等語向來曾任實缺道府丁憂起復後赴部投供吏部於此項人員內應否知照
軍機處自有定章吏部知照後軍機處應否進單自應查照向章分別辦理豈容妄事更張所奏著毋庸
議至所請將道府煩缺調煩卓異人員起復後仍發原省補用之處著吏部議奏○諭御史李郁華奏湖
南州縣勒索陋規設立私牢請飭嚴禁一摺據稱湖南新化縣遇有命案先令兩造交下廠費制錢數百
千不等詰驗時吏役動至百數十人復有搭廠班格等費設立東班房西班房快班房私牢數處敲撲陵
虐規斃繫繫無名白役不下二千人每案發差多至十餘人鄉民恣其魚肉等語州縣爲親民之官自
應潔己奉公約束吏役豈得婪索陋規多滋擾亂著湖南巡撫查明如有前項各弊卽飭嚴行禁革並通

行各屬一體查禁以重民瘼○予浙江山陰縣貞女蔡葉氏等旌表○予故河南歸德鎮總兵署安徽壽春鎮總兵徐麟附祀壽州臨淮兩處喬松年專祠甘肅哈密協副將署安徽壽春鎮總兵黃鳴鏞附祀泉城馬新貽專祠○甲戌 上諭 觀德殿 孝貞顯皇后几筵前行禮 丙子以麟書署步軍統領○丁丑 上諭 觀德殿 孝貞顯皇后几筵前行禮○楊昌濬奏前因甘省各標營餉薄兵疲難期得力懇請減兵增餉就地變通一切情形業經分列十條山前督臣左宗棠會臣縷晰奏明欽奉 諭旨飭部議准在案臣遵即咨行各提鎮道府會同切實履勘確議去後茲准陝西提臣雷正綰甘肅提臣周達武移行鎮協道府照依原議章程分別甘省各營官兵應減應裁數目並地方衝僻險夷或遷移更改或裁汰兼併案開細數清單請核辦前來臣復檄飭該司道公同妥議詳覆茲據署甘布政使李慎甘肅按察使魏光燾蘭州道曹秉哲詳稱逐營會核所有該提鎮等勘議甘肅各營官兵裁減移駐均係酌量今昔地勢聯絡盤氣辦理實爲妥善詳請具奏到臣經臣覆加確核甘省各營兵丁除新設靈武營化平營稍海城營甫經建置又涼州鎮屬水昌莊浪松山三營逼處蒙番兵數本單均毋庸議減外其餘各營按馬步守三項照議原定章程核減均屬符合大小官弁分別就地裁汰遷移兼併亦臻妥協所有裁缺之員按章另補惟以後新開行省無論設與不設必須另立營制未便再由關內調撥換防致有顧彼失

此之虞臣謹按擬定成數設處地方另繕清單恭呈 御覽下兵部議奏○戊寅諭御史順齡等奏甲米

進城遲延各倉花戶營私舞弊各摺片據稱本月十一日太平倉應放正白旗甲米雖至酉刻始到遂至

當日不能查竣迫經行催連日遲延如故並風聞各旗章京領米日期均有匪徒身後代領把持倉務以

致領放遲延弊端自出請飭申明舊章確查弊竇等語著八旗都統查倉御史申明舊章飭令該章京監

督等按照例定時刻領放不得藉詞推諉並將各倉弊竇查明申禁以重兵食而慎倉儲○己卯諭本年

九月初九日 孝貞顯皇后梓宮奉移 普祥峪 定東陵永遠奉安 靈輦經由道路一切應辦事宜

該地方官自應循例敬謹預備遇有借貸民力之處小民仰荷 孝貞顯皇后深仁厚澤亦必急公踴躍

藉以抒其報效之忱惟念民力拮据必應量為體恤著李鴻章重華游百川嚴飭地方官不准藉端格外

苛派致滋擾累用副朝廷軫念民艱至意○諭溥淋等奏應修要工請派員查勘一摺 奉陵 慕陵

昌陵等處各工均有鈔朽閃裂等情著派興廉敬謹查勘奏明辦理另片奏 大陵等處各項庫房工程

均形喫緊等語並著一併查勘○庚辰丁寶楨奏據銅管巴塘糧務候補知縣裕志文稟稱該員本年六

月奉文赴打箭爐會算交代於七月二十八日折回聞七月十六日行至距巴三站之奔义木地方接

該臺專差飛報巴塘教堂司鐸梅玉林被三岩野番劫殺情事該員星夜趕回詢據同住教堂司鐸畢大

祥面稱本月十五日梅玉林押運西國帶來鹽井等處教堂應用物件箱隻十三駄前往鹽井交收分送
因係自驟自馬並有乍了番商人夫馬匹同行恃無妨礙未經赴臺署知會照料詎意乍番商人落後梅
玉林獨行上前隨身僅帶數人插帳核桃園蠻塘側近被野番刦殺又詢據同行教民向興順供稱是日
隨梅玉林行抵距大石包二十里之核桃園因乍番落後即在蠻塘上手支下帳房等候時有蠻兵四郎
洛布聞信趕至向稱夾壩野番出沒無常此地斷不可紮千萬請回梅玉林以業經到此不願退回隨即
住下初更時聽聞犬吠令向興順出帳查看突有三人將伊按倒並有數十人擁進帳棚梅玉林在內施
放洋鎗立即轟倒一人匪眾稍退旋復四面圍攔擲石亂打梅玉林持鎗鎗放受傷倒地賊人上前砍戮
殞命惟向興順乘間掙脫躲避天明折轉查點失賊計刦去駄驟十三頭騎馬二匹箱二隻茶包一隻各
等語經該員親詣驗明梅玉林頭面均被刀石砍擊血污模糊右手腕骨斷左手腕亦被砍傷實係受傷
身死協同司鐸畢天祥將屍棺殮當時出具並未知會地方衙門不能相怪洋字結一紙請為查緝番匪
究辦現在該臺員已調土兵並請酌調營兵勦捕等情前來臣等查該司鐸梅玉林來川省巴塘傳教已
歷數年地方民教甚屬相安此次押運箱隻駄騎前往鹽井因不知會漢土臺官土司派護徑行前往追
蠻兵得信後速行前往再三勸阻又復執意不肯轉回以致慘遭刦殺其畢天祥洋字結稱並未知會地

方官不能相怪是明知梅玉林禍由自取惟三岩野番在該番地劫掠爲事實屬兇頑前駐藏幫辦大臣維慶由川入藏行至大石包該番匪賄敢攔路搶劫殺斃引馬人夫奏奉 諭旨飭該文武認真緝捕伏查三岩野番本係另種野夷向不歸漢官與土司管轄欽奉前因正設法拏辦聞詎該野番野性不馴又復刦殺洋人雖梅玉林任意獨行自蹈危險然其地究屬附近土司轄境似未便以無人約束稍從寬宥現將該土司等摘去頂戴該員稽志文雖公出未回仍應一併嚴加申飭勒令督率所調土兵六百名剋日深入番巢懸立重賞務將滋事首夥各兇番四面兜拏並設法購捕擒獲追賊給領盡法懲辦又以該野番地險山深並無定處一面飛飭臬和協副將況文榜挑選該營兵丁二百名率營營兵丁一百五十名飭派得力都守一員管帶起程以資兜拏並檄委打箭爐同知李忠清馳往督同該糧員土司等趕緊查拿追賊懲辦以期迅速而慰遠人 上諭野番肆行刦殺實屬兇頑著丁寶楨托克滿督飭派出官兵並嚴檄該地方等務將滋事首夥各兇番剋日拏獲追賊給領盡法懲辦不准稍涉延延致洋人有所藉口別生枝節○辛巳諭禮部奏請派近支王恭代行禮並將禮節開單呈覽一摺九月初九日奉移 孝貞顯皇后梓宮啟行朕前詣東直門大橋迤東恭送後 肅展梓宮前行夕奠禮並沿途行朝夕奠禮隆恩殿行饗奠禮著派惇親王奕諒恭代 隆恩殿行遷奠禮 梓宮升小轎奠酒行禮 梓宮安奉龍

輅上奠酒行禮 梓宮屆奉安吉時奠酒行禮 梓宮永安禮成祭壇前奠酒行禮 隆恩殿行虞祭禮
恭捧 神牌升 黃輿行禮著派恭親王奕訢恭代 梓宮至 大紅門遙向 祖陵行禮著派忠郡王
奕祥恭代 梓宮安奉 隆恩殿畢祭酒行禮著派莊親王載勛恭代 黃輿沿途朝夕祭行禮著派怡
親王載瀅恭代○諭本年春間 慈福端佑康頤昭豫莊誠景壽太皇后聖體違和調攝經年始臻安豫現雖
尚未復元從茲節勞頤養日益康強朕心實深慶幸敬維 皇太后慈祥愷惻薄海蒙庥而 宵旰焦勞
猶時以欽恤民命爲念朕仰體 慈懷特示寬政以示矜恤而迓祥和所有本年刑部及各省情實人犯
著停止勾決緩決人犯除三次以上者本年業經刑部查辦減等外其未屆三次者應如何酌量減等之
處著刑部詳核案情輕重分別奏明辦理用示朕法外施仁至意○壬午 上詣 壽皇殿行禮○予江
蘇吳縣節婦萬葉氏旌表○癸未諭本年九月初九日 孝賢顯皇后梓宮奉移 曹祥峪 定東陵永
遠奉安禮成後恭奉 神牌黃輿還京沿途經過地方百姓追思 德澤哀慕孔殷允宜特沛恩施以示
軫恤所有大興通州三河薊州遵化五州縣應徵本年錢糧著全行蠲免其應徵本年各項旗租並著一
併蠲免順天府府尹直隸總督速即刊刻謄黃徧行曉諭俾比戶周知均沾實惠該部即遵諭行○諭本
年九月初九日 孝賢顯皇后梓宮奉移 曹祥峪 定東陵永遠奉安禮成後恭奉 神牌黃輿還京

業經降旨沿途經過之大興等五州縣本年錢糧及各項旗租全行蠲免惟念秋稼初登正播種麥苗之際所有由京至遵化州一帶經過地方除隙地不計外凡有不毀麥苗者再加恩每畝賞給銀一錢俾農民購買籽種藉資補助卽於直隸藩庫節年耗羨款內動支給領核實報銷○實授劉錦棠爲欽差大臣督辦新疆軍務張曜幫辦軍務○允曾國荃開缺調理以譚鍾麟爲陝甘總督陳士杰爲浙江巡撫○以沈葆靖爲福建布政使剛毅爲江西按察使○以勝安爲古城領隊大臣○實授楊昌濬爲甘肅布政使○予湖南長沙縣貞女楊玉林旌表○實普濟堂功德林粥廠小米五百石蘆溝橋粥廠粟米四百石資善堂煖廠粟米三百石○甲申祭 歷代帝王廟遣本格行禮○乙酉 上詣 觀德殿 孝貞顯皇后几筵前行禮○予浙江秀水縣貞女陳氏旌表○丙戌予江西贛縣節婦陳羅氏等旌表○林肇元奏人才以有所蓄而始出人心以有所用而後安士類固然武夫尤甚當各省軍務未平之會各將弁奔馳戎馬嶺取功名意氣自豪習尚奢侈一經凱撤散漫無歸業既不樂於農商性復多近於曠悍家居則恆恥無事流寓則莫可安身良者亦不免怨聲藉藉者遂潛生詭計非爲妄作每出此途此曲突徙薪誠宜早爲之所而馳驅就範未嘗無可取裁也黔亂藉各省援軍克底平定留黔將弁實繁有徒益之本省收標數難更僕瘠苦之地差署無多每有恆恥無事莫可安身之恨臣從旁窺測知其戚戚之無聊復自憫憫而

致恐而此中平日束身稍知自愛者亦正多可造之才若聽其浮泛無依遂陷於作奸犯科實亦不可忍而殊大可惜茲擬設課技一營擇候補將弁之漢仗技藝可觀者二百名充爲練官酌予薪水專謀馬步鎗箭各給馬匹習成隊陣以正標左營參將爲正營長右營遊擊黃陽營遊擊爲副營長革率其事每月由臣閱操一次視其優劣分別賞罰通省練軍營務處會紀鳳璧正副營長分閱三次課以習勤而易熟善以相觀而易爲步伐必期於整齊號令必期於嚴肅臣更謹摘刊 國朝設兵衛民切要功令並編輯古今兵法武備數十則令於操練之餘由營務處營長等相與逐則討論臣於接見之下重爲講以導之以忠義激之以勇敢久之可卽其言論舉動以觀其志趣器識擇其漸臻於善者量爲差署去其愚惰不率教者以別升降便知所激勵如此有薪水以贍其身家有職業以束其心志化其桀驁不馴之氣以就我範圍庶不致有憚憎生心之患以隱儲爲 國家有用之材或於人心稍有裨益報聞○丁亥諭九月初九日 孝貞顯皇后梓宮奉移 曹祥崧 定東陵永遠泰安所有經行道路理宜倍加整肅著步軍統領衙門直隸總督飭令該管各員并嚴加管束不准執事員役人等車馬踐踏及於路旁擁擠倘敢不遵無論大小官員卽行據實糾參兵丁太監校尉人等卽著從嚴懲辦○以徐卹爲兵部右侍郎兼署工部右侍郎○大學士全慶致仕仍賞食全俸○勒方鐸以病免以梅啟照爲河東河道總督○以瑞聯爲

正藍旗漢軍都統○戊子銘安等奏前以長春廳地方緊要請以候補理事通判鍾彥補授嗣准吏部咨稱長春廳理事通判出缺在先該員銷假在後核與定章不符仍令另揀合例人員請補等因奴才等遵照部咨復加詳核揀發人員內只有毓綬一員係候補理事同知通判而該員與是缺人地實不相宜現在青省正當整頓之時期於得人而治未便拘以文法稍事遷就查鍾彥年壯才明請求吏治先後委署該廳於地方一切事宜經理妥協人地實在相需未便再行紛更轉致貽誤仰懇 天恩俯念員缺緊要人地相需仍准以候補理事通判鍾彥補授長春廳理事通判誠於邊缺大有裨益等因具奏於光緒七年七月十六日實到回摺軍機大臣奉 旨著照所請吏部知道欽此欽惟 聖主為缺擇人不循人格用是 乾剛獨斷 特旨准行不復再交部議奴才等跪聆之下欽佩莫名當即札飭鍾彥遵照在案乃於八月十六日接准吏部咨開查吉林理事同知通判既定為按到省先後序補與各省准其酌量請補煩要之缺者不同自不准該將軍等聲敘人地不宜況於輪用應補業經見缺之後始行聲敘人地不宜顯有為人擇缺情弊該將軍等於合例應補之員置不序補輒將告假離省例應扣補之鍾彥一員違例請補臣部正在核擬奏明請 旨更正復據該將軍等奏將揀發吉林候補理事同知通判毓綬一員請送歸部仍以本班照例用等因查該將軍等於長春廳理事通判一缺種種背例較之提補參差尤為刺

謬顧係有意徇私爲人擇缺毓綬兩次署理吉林同通各缺辦公既無貽誤不在參劾之列不准於駁令序補以後率將未能裕如等字空言甄別將該員送歸部用以遂其爲人擇缺之私相應申明例章據實參奏請旨更正飭令該將軍將長春廳理事通判一缺另揀合例應補之員查照例章序補以符定制而杜流弊並請將該將軍等照章加等議處如經此次駁令序補之後倘再不遵例章復行強詞續請部卽卽將長春廳理事通判員缺查照定例歸部揀補並將該將軍等再行從嚴議處等因具奏奉旨依議欽此鈔錄原奏咨行前來奴才等接閱之下不勝驚駭查直省督撫奏補各缺經部議駁如人地實在相需復行奏請或卽議准或再議駁另補屢閱邸報比比皆然從未見有因奏補員缺而上司被部特參者更未見有秉公遴選委缺擇人而部故入以私罪處分者緣向來各部凡有咨奏事件均由主稿司員擬稿呈堂在司員中公正廉明辦事認真者固不乏人而與胥吏夤緣舞弊狼狽爲奸者亦所不免往往各省奏補一缺部中揣其肥瘠或准或駁卽得上下其手顛倒其心懸一例而預謀於先更變一說而圓通於例外實足以快其私而不足以杜其弊部中政務皆係滿漢尙書主持左右侍郎亦止隨堂畫諾尙書事務殷繁日不暇給每於進內時司員乘間回事應行稿件不過立談數語未能詳閱查核而不肖司員遂得售其欺朦如吉林長春廳理事通判一缺部中始則必令以薩呢揚阿坐補不准將該員甄

別歸部銓選幸蒙 聖明鑒察以奉 特有掛印坐補該部無可如何茲奴才等請將鍾彥補授斯缺部

中謂接到部駁後復將合例應補不准聲敘人地不宜之毓綬違例擬補仍以告假離省例應扣補之鍾

彥違例奏補並謂毓綬兩次署理吉林同通各缺辦公既無貽誤不在參劾之列茲於駁令序補後率以

未能裕如等字空言甄別以遂其爲人擇缺之私等語夫人之才具有短長缺之治理有難易如謂曾經

署事人員無論繁簡缺出皆可補授則不應有酌量補用之條更不應有人地不宜互相對調之例矣又

如部議吉林理事同知通判既定爲按到省先後序補自不准聲敘人地不宜倘該員才力不及雖勝繁

劇亦卽含混序補任其廢弛公事貽誤地方乎且直省皆請求吏治何以吉省獨不應講求吏治直省皆

甄別人才何以吉省獨不應甄別人才此亦事理之不可解者也總之人員賢否部中詎得而知之奴才

等身任封圻察吏安民職所當盡非不知奉行故事粉飾因循卽可見好屬員復可免干部議惟以受

恩深重具有天良欲期安輯地方必須整飭吏治現請將鍾彥補授長春廳理事通判原屬爲缺擇人何

謂爲人擇缺乃部奏云奴才等有意徇私奏請加等議處若以違例奏參則可若以徇私議處誠不知部

臣果何所見而云然也應請 飭下吏部堂官明白回奏如該堂司確有見聞卽令據實指參請 旨派

員秉公查辦倘實有意徇私爲人擇缺情弊則將奴才等從重治罪夫復何辭若無其事是主稿司員妄

肆詆誣故入人罪書稿堂官不察虛實率行入奏均當分別懲處以示大公奴才等非敢強詞置辨上瀆
宸聰惟事涉徇私有關名節下忱冤抑不得不呼籲於 君父之前至長春廳理事通判員缺既據部
議以鍾彥例應扣補奴才等亦不敢固執已見再行稟請惟毓綬寶在人地不宜斷難遷就業經甄別送
歸部用應毋庸議其據發通判陳治留省補用通判王詔元趙光燾均係出缺在前至省在後與例不符
吉省現無合例應補之員擬請按照吉林奏定變通章程咨行奉天府府尹將該省曾任實缺州縣人員
調吉升補長春廳理事通判以符定章 上諭銘安等奏部駁奏補通判與例不符擬照章由奉天調補
並請旨查辦一摺前據銘安等奏請以鍾彥補授吉林長春廳理事通判以與例不符經吏部奏明更正
並請將該將軍等議處係屬照例辦理惟措詞未免過當銘安等於部駁之案輒復曉曉置辯語多負氣
亦失大臣之體所請查辦之處著毋庸議至所奏長春廳理事通判一缺吉林現無合例人員擬照奏定
章程由奉天曾任實缺州縣內咨調請補等語著吏部議奏○己丑張樹聲等奏粵東候補試用人員仍
形擁擠請展停分發二年下吏部議奏○銘安等奏吉林園場開放荒地停止貢餉先後奏奉 恩旨允
准在案現在遴派委用知州彭明道等前往勘放各荒並令相度應設城池村鎮地基以便添設民官劃
疆分治其園場舊設卡倫官兵原以禁止流民潛入今既奏准開放荒地安輯流民此項官兵已無職守

應卽裁撤以節虛糜吉林一城所屬無可再設圍場貢鮮既蒙 恩免進每年冬剛自應一併停止除督飭該委員等將放荒設官各事宜妥擬章程另行奏辦外伏查冬令舉行圍獵原爲操練官兵藉資習武近年以來吉省流民麇集伏莽滋多分派官兵勦捕賊匪搜查各山冬季尤爲喫重在圍獵尙有定期而巡緝實無暇晷絕無怠惰偷安之弊卽將來地方一律平靜亦必嚴加訓練精益求精不令鎗馬生疏軍政廢弛以期仰副 朝廷經武整軍之本意下部知之○是月美利堅國使臣安吉立回國參贊何天爵署理

九月庚寅朔諭禮部題本年十月初十日 慈禧端佑康頤昭豫莊誠皇太后萬壽聖節禮儀請 旨遵行等語朕奉 懿旨是日著停止升慈寧宮寶座停止筵宴毋庸設立儀仗樂仍設而不作皇帝於養心殿行禮王公大臣二品以上各員在慈寧門外行禮三品以下各員在午門外行禮所有內廷宮眷及王公福晉命婦均著停止行禮○諭御史蕭韶奏近聞直省各府昭忠祠致祭者甚少甚至向地方紳士先索差費然後往祭請飭一律致祭等語各省建立昭忠祠原以慰忠魂而作士氣若如所奏各情實屬不成事體著各直省督撫嚴飭各該地方官照例於春秋二祭親詣行禮不得仍前怠玩以重祀典倘有索費情事卽行據實奏參○蕭韶奏湖南耒陽縣有產煤處所土名煤隱每掘煤時深卽見水向係僱工

車出嗣因奸徒漁利遂設計誘買窮民作工名曰水蝦蟆或誘入賭博局博資既盡則促賣入僱或外來愚民陷於不知卽被誘賣賣價一二千文至數百文不等入僱後永無歸期該縣戶虐待工人衣不被體食不果腹有活閻羅之稱令工人分晝夜兩班站立水中輪流推車歇班則裸臥爐旁以就火氣幾不復以人類相待連年被害而死者不下數千人雖屢經地方官出示嚴禁該縣戶仍巧爲規避地方胥役亦視爲利藪弊積歷以致冤抑莫伸深恐釀成事端更難收拾相應請 旨飭下湖南撫臣督飭該府縣嚴定章程設法禁止倘該縣戶等陽奉陰違仍蹈前轍卽照誘騙拐賣人口例治罪並將該縣入官以示懲儆庶民命可保而後患可消矣 上諭御史蕭韶奏湖南耒陽縣有產煤處所土名煤條奸徒誘買窮民作工入僱後永無歸期該縣戶虐待工人連年受害死者數千人屢經地方官禁止仍敢巧爲規避請飭嚴禁等語奸徒設計漁利虐待工人致戕生命實出情理之外所有情形恐不獨耒陽一縣爲然著該撫飭屬查明嚴定章程實力禁止倘該縣戶等陽奉陰違仍蹈前轍卽行從重治罪如有胥役包庇等情並著嚴行懲辦毋稍寬縱○辛卯鮑超奏採辦軍火委員玩延逾限並侵蝕銀兩請將記名總兵李國珠暫行革職收押嚴追得 旨如所請行○張緒楷奏昔年欸充裕時東北兩河修防歲發數百萬保獎照軍營例處分亦嚴自部庫支絀裁冗員去浮費歲修不及其半處分乃因之較寬然使大臣督率有方員

弁力加振作實事求是涓滴歸公未始不足於用無如人情好利忘害積弊已久結習未忘不思聖恩之高厚反以法寬爲可恃減料偷工視爲故事甚且敷衍蒙蔽全飽私案以致日就廢弛動輒潰溢當險工迭出之時不爲可慮轉覺可喜以爲獲咎不過革職留工耳不數月間修復卽開復原官依然故我又可多領帑項從中侵漁此其尤堪痛恨者也非嚴爲懲創不足示儆應請 旨飭部嚴定處分一經革職永不敘用並不准留工効力庶人心知懼而河務日有起色矣 上諭通政使司副使張緒楷奏嚴定河工獲咎人員處分等語著該部議奏○諭軍機大臣等通政使司副使張緒楷奏河南固始商城興安徽六安霍邱交界處所地方遼闊山深林密最易藏奸民俗强悍伏莽未清請飭擇要布置或分設縣治或移紮專崗以資控制等語著該撫等體察情形會商具奏原片著鈔給閱看將此諭令知之○癸巳 上詣 觀德殿 孝貞顯皇后几筵前行禮○諭吳大澂奏審明職官藉差科派請旨嚴行懲辦一摺已革雲騎尉永平前經吳大澂派往奉天領解軍火沿途捏折車價滋擾鄉民實屬荒謬已極著發往軍臺効力贖罪以昭炯戒○以拿獲營房窩贖匪徒飭該旗都統查取該營營官職名從嚴參辦○甲午予四川華陽縣烈婦葉鍾氏旌表○湖南提督鮑超奏查獲私刊關防印信匪犯田報謝李易等訊明實情嚴緝餘犯報聞○朱以增奏順直各屬旱澇頻仍民困已久其順天及天津河間數府幾至無歲不災皆係水

爲之害近年督臣李鴻章督率升任藩司任道銓工賑總局候補道盛宣懷等力籌大局將淤淀大清河運北運數大河以次開濬今年河流順軌年穀豐登爲十數年來所未有現在李鴻章督率司道尙籌濬東西兩淀之尾閘使水性直下無阻左宗棠亦派所部開挖永定中泓果能從此嚴禁堵築盡力疏濬使水從地中行河患斷無不除之理臣竊謂治水如治兵不善用之都成水患能善用之卽成水利直隸低窪之地極多不宜於種高粱而宜於種稻雍正年間特命怡賢親王總理營田不數年墾成六千餘頃厥後效有明徵而功猶未充其所以難持久者因官爲之耳夫農田之事官爲之不及民自爲之也北省民不食米故不喜種稻聞今年文安大城霸州任邱天津等處種稻甚多而苦無銷路則民將視種稻爲畏途何足以勸民耕哉道光年間前督臣林則徐謂統計南漕四百萬石之米如有二萬頃田卽敷所運倘恐歲功不齊再得一倍之田亦必無虞短絀又謂如仿雍正年間成法先於官漕試行興工之初自須酌給工本若墾有成效則花息年增一年譬如成田千頃卽得米二十餘萬石或先酌改南漕十萬石折徵銀兩解京此後年收北米若干概令核其一半之數折徵南漕以爲歸還原墾工本及續墾佃力之費等語臣思江浙久辦本色未易頓改折價查光緒初年江西湖北湖南三省曾令招商局採買漕米十三萬石每石定價庫平銀二兩三錢五分今年江西湖南停止惟湖北尙有三萬石應請旨飭下江西湖

南兩省在於光緒七年漕折之內援照招商局前辦章程各辦採買三萬石按前定採運價值每石二兩三錢五分解交直隸總督迅速發給水利局司道在於順天直隸所屬採米之區平價採買卽資成水利局徑交通倉收納大約本地糙米每石不過銀一兩五錢左右運交倉經費不過三錢五分左右尙可餘銀五錢第一年採買六萬石卽可餘銀三萬兩卽以採辦之短餘開水田之荒地來年如再豐稔便可續添採買四五年後將不費 國家絲毫之帑稻田可成萬頃而民生無枵柚之嘆北米可抵南漕而國計無轉輸之費此實 國家久大之規倘畏其難而置之則實事徒託空言倘因其利而導之則積漸可期大效 上諭順天府府丞朱以增奏請飭撥江西湖南漕折銀兩解交直隸採買米石並開辦水利一摺著戶部議奏○乙未諭惇親王等奏甲米到城時刻請飭酌核成例以便遵行一摺八旗關領甲米自應催令米車迅速進城惟振柙各旗領米數目不同天時長短道路遠近亦有不齊勢難概令米車於巳午之間全數進城亦屬實在情形應如何酌量變通之處著戶部會同參酌成例妥議章程具奏○諭彭玉麟先後陳奏請開兩江總督署缺並開巡閱江海差使各一摺覽奏情詞懇切自應俯如所請准開兩江總督署缺至該侍郎巡閱江海有年不辭勞瘁整頓水師深資倚任仍著照舊巡閱毋許推諉劉坤一著卽開缺大學士左宗棠著補授兩江總督兼充辦理通商事務大臣劉坤一著俟左宗棠到

任後再行交卸來京陛見○內申諭前據給事中戈靖奏參理藩院官吏勾通冒領恤費等情當經諭令理藩院查奏茲據奏稱遵將歷年所辦請領蒙古恤費各案咨山戶部查覆實有未經辦過之案以印文印領赴部庫請領銀兩頗有勾通捏造情弊等語著刑部提訊未慶雲嚴切根究如何與理藩院書吏勾通舞弊高振廷究係何人務得確情嚴拿懲辦領催崇林著庫倫辦事大臣迅速解京歸案審訊鑲白旗蒙古佐領崇惠著降候傳訊○賞給五城粥廠及崇善堂等煖廠米石○劉坤一奏重建江甯省城鍾山書院報閩○丁酉 上諭 觀德殿 孝貞顯皇后几筵前行禮○諭丁寶楨奏請將貧劣各員革職查辦等語四川著峨邊廳通判候補姚建寅藉修個堡為名肆行苛派民怨沸騰著名山縣知縣候補知縣周綸辦理乖謬聲名狼籍控案繁疊且有藉端恐嚇扣派等事均著先行革職提省查辦以肅官方○予廣西臨桂縣節婦劉詹氏等旌表○戊戌 上諭 觀德殿 孝貞顯皇后几筵前行禮○孝貞顯皇后梓宮泰移 曹祥略 定東陵○諭祥亨等奏軍臺廢員山配脫逃請旨飭緝究辦一摺廢員張潤照攻山配脫逃難保不潛行來京著步軍統領衙門順天府五城御史一體嚴拿務獲究辦○慶裕奏廣西捐納勞績候補人員仍形擁擠請再展停分發二年下吏部議○己亥以本年恭請 孝貞顯皇后梓宮暫安 觀德殿看守衛景山內外護軍營兵丁及內務府三旗兵丁半月錢糧○以 孝貞顯皇后

梓宮奉移 山陵費恭請 大鑾之直隸補備民夫銀二千兩尋加費銀三千兩○庚子劉錦棠奏吐魯

番城善後事宜現均辦有條緒擬撤探運撫輯善後局以節糜費報聞○辛丑丁寶楨奏查川黔交界伏莽向多均經臣隨時咨會黔省並嚴飭本省防營將弁暨地方文武各員不分畛域會同實力查拿懲辦前經訪查得川黔連界之新隆二郎灘地有積年巨匪陳肇基又號陳山寨在於該灘地面糾聚匪黨設立卡局徵收稅釐凡遇商貨經過勒索抽稍不如意即行截奪並於單行客商攜有資財者輒即殺斃屍棄江中以爲滅跡地方商旅無不受其慘害雖經控告而交界之處此拿彼遁且該匪黨惡甚衆殊難得手臣以該匪一日不除地方即一日不靖且恐釀成隱患當經密飭統領安定營建昌道唐炯嚴密督飭防營不動聲色隨時選派勁勇改裝查拿茲經安定營帶總兵何行保不惜重賞購線密捕歷時三月始將該匪陳肇基拿獲解赴瀘州防營臣以該匪黨與甚衆遠道解審疏脫堪虞即經飭委候補知府張四庸前往會同署瀘州直隸州知州鄧林親提該犯研訊確情據供糾聚匪徒徵收稅釐截奪商貨並劫殺客商棄屍江中滅跡等情不諱實屬罪大惡極法不容誅即將該匪就地正法梟示犯事地方以彰國法而快人心至督帶安定營總兵何行保於積患巨匪盡力查拿不令漏網俾地方除一大患實屬異常出力相應仰懇 天恩俯准將補用總兵何行保賞加提督銜用示獎勵得 旨如所請行○壬寅

銘安等奏前因古省經費支絀擬請試開煤窰抽釐裕餉當經酌擬釐章奏明招商試開石碑嶺等五處煤窰釐酌改稿有煤窰從前課章與新添煤窰一律派員稽查抽收釐稅等因在案茲據商人徐繼明等具呈續報大石頭頂子等五處均見煤縫堪以開採等情當即派員分往各處勘驗去後旋據防禦春和查明大石頭頂子煤窰一處同知李喬林佐領占祥等查明陶家屯亂泥溝子煤窰二處知縣傅楨雲騎尉承齡查明半拉窩雞溝煤窰一處知縣傅楨防禦桂祿查明二道河子煤窰一處均各顯露煤縫堪以開採與禁山風水俱無關礙取其山主四鄰情願招商甘結繪圖貼說加結具報前來奴才等即飭總理煤務事務協領富爾丹掌工司關防協領金福酌核招商茲據稟稱招得商民徐繼明承領大石頭頂子煤窰張福永承領陶家屯煤窰董起發承領亂泥溝子煤窰劉運符承領半拉窩雞溝煤窰韓受德承領二道河子煤窰所招商戶均係土著殷實之民取有切保等情稟復前來奴才等詳查古省新陳煤窰八座連今續添煤窰五座共有十三座所有續添試採煤窰稽查抽釐等事前既擬定章程自應統照新章一律辦理報聞○癸卯黎培敬奏自清江王營鎮起至山東交界之紅花埠止計程二百餘里為南北往來大路兩省毗連盜匪出沒無定行旅苦之清淮防軍本單巡緝各屬已患不敷勢難再於長途聯款臣與署淮陽鎮總兵歐陽利見淮揚道桂嵩慶悉心商酌節省經費每三里建蓋瓦堡一所豎立旗幟刀

予以張聲勢卽於附近營汛撥兵五名駐守每名日給口糧燈油錢五十文共建堡房七十六處派兵三百八十名無論官民行旅概令持械護送上下接替不稍間斷自本年六月告成以來沿途尙稱得力頗爲安靜又睢肝長隄從前原有兵堡三里一座軍興以後片瓦無存現在石工漸次修齊而汛兵棲身無所且長隄數十里爲皖省往來要路人烟稀少過客長有戒心臣與淮揚道桂嵩慶商酌仍按三里一堡舊制建蓋瓦堡房三十五處每處房屋三間撥用墾洲徐壩二汛兵丁七十名每名每月給與口糧錢一吊五百文一堡二兵長年駐守晝則填補狼窩搜獾穴夜則懸燈擊柝巡警支更似於河工地方兩有裨益報聞○甲辰發內務府恩銀三千六百兩散給貧民棉衣○黎培敬奏撫恤鹽城一帶被災兵民並籌善後事宜以工代賑報聞○乙巳葉蔭昉奏前年辦理海防調派提督宋慶統帶所部豫軍駐紮營口餉項專由豫省接濟嗣後各處防軍酌量裁撤惟宋慶一軍尙留關外查豫省餉源丁地之外甚屬寥寥此項一軍遠在西陲需餉甚鉅豫省自宋慶去後添募新軍餉需益繁今年穀順登供億已形竭蹶萬一水旱偏災匱乏尤爲可慮關東土田肥沃士民殷庶物產富饒水陸交通天府之地也而議者每謂無可籌餉之處臣竊疑之年來留心訪問凡商賈輻輳之區似乎餉項亦尙可籌但爲本地豪猾土棍勾結書差上下蒙蔽盤踞把持稅則訖無定章強梁者卽可染指良懦者因而愈困若確知其弊誓爲設法再得

廉能之員以經理之當於餉需不無裨益謹酌擬三端以備 採擇一曰木稅奉省大孤山海口界連朝鮮三百里內荒山無主產木極多每年出口動以萬計京城所用木料大半自此購運惟徵稅並無準章可否 飭下戶部查明此處有無稅課報部或報部若干查照各關徵收常稅之例咨行盛京將軍慎選職分較大廉能之員專司其事力除中飽參照地方情形酌量整頓務使稅課歸公則成數必有可觀一曰雜糧近來關東雜糧出入海口均所不禁如營口附近之天橋廠馬蹄溝沒溝營等處所有釐金均爲土豪所把持與書差上下蒙蔽其實到官不及十之二三而地方官得受陋規又爲之扶同捏飾及至解省不過僅有其名同治十一二年間屢有商人在戶部將軍衙門呈充經紀將課稅報部升科爲數甚鉅經戶部核准咨行盛京將軍轉飭確查試辦輒格而不行而蒙稽書吏惡其漏洩輒藉他案拖累將該商等幽繫牢圍以致相率竄口莫敢再舉可否 飭下戶部查提升科舊案照例辦理咨行盛京將軍轉飭試辦並嚴飭該地方官不得藉端阻撓庶此項釐金可歸實用一曰鹽釐查崇實崇厚在將軍任內議准新設廳縣籌修城池衙署及地方辦公各款以鹽釐爲大宗伏思工程完竣有期地方辦公亦無定額可否 飭下戶部查明此項鹽釐徵收若干曾否報部有案酌提一二成撥充軍餉於地方辦公尙當不致貽誤而積少成多亦卽可以濟師矣以上三條就臣思慮聞見之所及略陳梗概倘由此足敷接濟則

營務地方交涉既多情誼亦聯主客之間無難水乳互爲輔依卽兩有裨益豫省卽有缺乏亦可無虞不繼矣 上諭御史葉陰昉奏奉省防事宜由秦省接濟酌擬籌餉各條一摺著戶部議奏○梁俊奏奉吉兩省同通州縣各缺奏請揀發或奏請揀補原以民稀地廣缺分無多故各項正途人員從無簽分該省之例今則荒地日闢民生日聚改設各缺逐漸增加以盈捐稅課捕盜查荒事務殷繁倍於曩昔該將軍等以本省差委之員每藉口辦理洋務將外省不合例人員指名奏調始而差委繼而保留終於請補以致銓補無期之輩取巧鑽營紛紛趨赴流弊實多且吏部於該省奏請時動以一缺一事未便奏派須彙積多案始行辦理又或要缺無人該省違例請補經部議駁往復執奏累月經年以致員缺久懸輾轉遞署尤非政體卽如鍾彥請補長春廳一缺屢演 宸聰曾經 訓飭吏部措詞未免過當該將軍等語多負氣亦失大臣之體是內外牴牾已在 聖明洞鑒之中現在新設各缺事同創始若不豫爲分發先資歷練該將軍恐干吏議勢必遷就請補貽誤地方關繫殊非淺鮮臣以爲弊去其太甚法期其能行今日奉吉之弊固當嚴爲禁革而吏部之法亦宜量爲變通者也可否請 旨飭下吏部於進士卽用舉人大挑以及各項分發核計該省缺分若干酌量配簽掣定發往庶收得人之效亦資集事之益 上諭御史梁俊奏奉天吉林兩省請仿照內地分發正途人員以資治理一摺著吏部議奏○丙午先是英人要

求通商雲南雲貴總督劉長佑遵 諭疏覆雲南邊界有礙洋人通商情形議遂寢至是劉長佑知法人志在必得越南以窺滇粵乃疏陳管見其略曰邊省者中國之門戶外藩者中國之藩籬藩籬陷則門戶危門戶危則堂室震矣我 聖祖親征漠北 世宗揚威青海 高宗戡定金川盪平回準闢地三萬餘里而近海諸國不欲侵夷者凡以屏蔽山海捍衛 神京也諸國修貢奉職世爲不侵不叛之臣親莫如朝鮮順莫如琉球恭莫如越南朝鮮爲 盛京之門戶越南爲滇粵之臂齒視琉球之遠在海南形勢更重泰西諸國自印度及新嘉坡檳榔嶼設立埠頭以來法國之垂涎越南久矣開市西貢據其要害同治十一年復通賊將黃崇英規取越南之東京聚兵合謀思渡洪江以侵諒山諸處又欲削越南廣西邊界地六百里爲駐兵之所 時任廣西巡撫雖兵疲餉絀餘盜未平卽遣將弁出關往援法人不悅訐告通商衙門謂 臣包藏禍心有意敗盟賴 毅皇帝聖明洞鑒察 臣愚忠乃得出助勦之師內外夾擊越南招用劉永福以折法將沙曾之鋒廣西兩軍左路則提督劉玉成趨太原北甯右路則道員趙沃山興化宣光分擊賊黨直抵安邊河陽破崇英巢穴殲其渠魁故法人寢謀不敢遽肆吞併者將逮一紀然 臣每詳詢邊將知法人之志終在必得越南以窺滇粵之郊而通楚蜀之路夙夜惴惴懼其狡焉思啟所恃條約已定 國威日隆庶幾開埠之外當無異志乃入秋以來法國增加越南水師經費其下議院議准籌備

二百五十萬佛郎經理東京海灣水師其海軍卿格羅愛逐日籌畫東京兵事俟奧尼斯案一結即可起程遣艦之餘不勝惶駭竊歎法人果蓄志而潛謀嗜利而背約也聞造此謀者爲伯明手般在越南西貢爲巡檢司開埠之後招入土夷客民衆至百萬民情漸洽物產日增柬埔寨所招商民亦逾百萬運米出洋歲百萬石所徵賦稅入西貢庫藏者歲計佛郎二百五十萬牧埔本荒蕪開成通衢車路方軌溝渠修濬越南素奴視柬埔寨人今柬人感法恩德至願以六百萬口獻地歸附故伯明手般以越南情形告其總統當良江一帶法人已駛船開市議上溯以達瀾滄江通中國之貨結檣方諸夷以窺河粵邊境築西貢至柬埔寨鐵路以避海道之迂繞越南四境皆有法人之跡政治不修兵賦不足勢已危如累卵今復興兵吞噬加以柬埔寨之叛民勢必摧敗不可支拄矣同治十三年法提督僅囑礮示威西三省已入於法越王許於紅江通舟地險已失所立條約惟不肯予以東京國勢岌岌恃此爲犄角今復奪其東京即不窮極兵力圖滅富春已無能自立況豺狼之性有不可測者乎臣以爲法人此舉志吞全越無疑既得之後必請立領事於蒙自等處以攘山礦金錫之利或取道川滇以通江海據列邦通商口岸之上游況滇南自同治以後平定逆回其餘黨黠桀者或潛竄越南山谷或奔洋埠役於法人不免告以軍情虛實邊地情形故時有夷人闖入滇境以覘形勢備法覆越南逆黨又必導之內寇逞其反噬之志也或以爲西

人志利不過意在通商不知吐蕃求互市而我馬踐於汧渭之郊先零盜牛馬而烽火徧於河湟之上不能徇其一時之習遂信其不肆侵陵也我國家惠養蠻貊荒島來廷雖假以租地給以金錢而夷性冥頑不知禮義受恩而不感嗜利而無厭毋快睚眦寢以驕悍其罪誠有不容誅者然臣又以爲此非法人之罪而東夷日本之罪也夫日本一嶽岑小島耳孤懸海中不廁朝貢之例自西人通商乃從諸國後設公司於滬上非有英法之富布德之強朝廷寬以待之冀其安靜而乃貽議不悛首敗盟約同治之末弄兵臺灣與生番造孽以耀武西夷嘗試中國 毅皇帝貸而不誅既而遂滅琉球夷其宗社矣夫中山王世受 天朝職命爲我屬藩見滅外夷義在必討同爲與國肆其暴橫卽以西人所立萬國公法言之亦罪有必問而英法諸邦絕無起而論者則以中華沃土各有豔心惟以 國威尙震莫敢先動有爲戎首者則視其禍福安危以爲進退 國家既釋倭人而不誅則知中國好安而惡戰 國家既不問滅琉球之罪將來必不與開法越之兵交此法人惴然肆意敢於闢我門戶而翦我藩籬之故也臣知 皇上於法人此舉必將赫張我武 天罰恭行然卽出援師禁侵暴所向克捷而法人猶必藉日本爲辭無以懾其驕悍之氣故不若及法師未出東京未滅之時先討日本以復琉球時雨之師足以下俘囚之涕九伐之法尤足以折逆夷之心是不戰而存越南也臣極知 皇上以息兵養民爲心不欲勞師遠涉然諸

夷桀黠如此尤而效之日引月長亦終不能弭兵而省費所用之兵賦將有百什於今日者故臣願皇上稽其大斷亟正倭人之罪而杜諸夷之奸也夫日本賴中國通商以爲國計今其財力虛耗法燭武民怨其上數戕官吏已有亂萌非如法國財富民強將吏趨仇也日本內侵江浙必候風潮帆船所指皆有定處非如越南之錯壤濱粵緜亘山谷隘不勝防也及此時而不日本之討坐待越南之亡則美國久覬朝鮮必起而掠之英人已通緬甸必劫而持之暹羅與緬人構衅俄國與新疆交界其壤未定又將窺我之隙而侵越之因利乘便同時并舉則不惟河塲之憂而欲求如今日之但謀東征亦不可得故臣以爲寢兵而禍大不如急征而禍小也頃者琉球遣臣潛來中國畏倭人之勢不敢控告匿名歛迹泣於天津而日本使臣迺敢以擴張疆土於通商衙門曉曉置辯無理已甚臣遠在邊隅不勝憤懣逮聞俄國和約已成私心竊幸以爲北邊已安可以移防北之師出而東討旋聞有旨裁撤防軍皇上深仁涵育已赦倭罪而不問臣愚卽思以夷情入告求伸天討猶冀諸邦之不相顧而起則恩兵亦所以懷遠不謂俄防始撤之時卽爲法兵伺隙之始不正日本之罪何以折法國之謀不止法國之奸何以肅諸國之志伏乞皇上先舉日本之罪簡大臣宿將有威望者起東三省之兵出松花江以臨庫頁島別命一軍出朝鮮以扼其西而後選明習輜略熟習水師之將由寧波定海率舟師趨長崎以攻其南或慮來擾海

溯則東南沿海久設練軍亦自有防禦之具琉球臣民喜復疆土必將有助順之師惡廟算之長海外有哉天戈遠震四夷戢兵朝鮮遑羅細甸諸國可免蠶食不獨越南也若慮兵端一開挑畔諸國則倭人法人背萬國之公法即聚西人於海上而議之亦不能巧爲辯說黨惡而崇寇也或有懲元世祖五龍山之役及明嘉靖倭寇之患者以爲東夷抗勁勢不可撓則不知元世祖好勦遠略所用皆騎兵非義兵也明倭寇之殺掠江浙蚌始妖僧羅海爲亂者漢奸非今之逆夷也以中國全力誅一日本何患不濟以順討逆以義攻驕春秋傳曰師直爲壯曲爲老臣願國家以睦鄰之道興問罪之師諸國聞風無敢置喙矣且自同治以來講求洋務設立海防習水師修礮臺購鐵船造鎗礮費帑藏以百萬計而曾不得一日之用亦安知兵力之果精與否彼四夷之環坐而觀聽者又烏知朝廷寬大之德而不以爲懷安之計耶況自南海議和以來三十餘年矣未聞守其前議不進而要求口岸之設歲進而日加諸國之蚌循生而迭起其虛立公法不能自守明矣即欲長保和約亦必有以固其藩籬示以武略而後不爲外夷之所輕甘於從我之約束昔漢有閼梁伊吾之勝而後匈奴無焉者之使唐有李晟西川之捷而後南詔有默蒼之盟能戰而後能守能守而後能和本末先後古今一體若隱忍相安匿罪不討頓兵謁伺日月若流宿將凋謝諸夷日驕兵食愈繁禍亂愈甚何如先發而弭未來之患懲一而戢諸國之謀臣受國殊恩

老病衰耗嘗憾曠職過賴無以報三朝之殊遇遐陬引領阻於見聞現在倭人能否悔悟或 朝廷已有成算皆弗克知惟受任邊方密邇外寇不敢開而不告也奏入不報○涂宗瀛奏本年六月間汝寧府光州所屬境內擒匪聚眾豎旗攻破民寨焚燒殺掠經臣先期派往駐防之練軍練勇會合地方文武克復寨城擒獲總匪首徐中義訊明正法由臣於七月二十日馳奏奉 旨辦理尙爲妥速在逃餘匪仍著涂宗瀛飭令派出官兵及該地方文武搜拿淨盡務絕根株等因欽此欽遵在案當經檄飭搜拿去後嗣據管帶練軍提督姜桂題管帶練勇提督李永芳汝寧府知府王兆蘭光州直隸州知州姚國慶暨各該地方文武先後稟稱此股擒匪蓄謀已久勾結甚眾當其由正陽縣之翰鎮新蔡縣之劉莊等處被兵勇擊敗突入息縣攻破趙家園楊家村等處民寨在於寨牆遍插旗幟抗拒官兵勢頗異常猛熾幸各練營兵勇丁役民團合力圍攻爭先肉薄將該寨城立時克復未經久踞蔓延及其破敗奔逃猶復屢次回敵官軍感張家寨兵役民團受傷不少賴各將領員弁督率奮追陸續在路斬擒多名並奪獲其馬匹器械多件匪勢遂不能復振維時動手人數雖非大股而轉相糾約實繁有徒其皖匪一路見事不濟並經皖省查拿風聞解散其糾約本處股匪及山趙家園遁出餘夥除總匪首徐中義先經姚國慶督率息縣拿獲正法外復據正陽縣知縣馮德綬拿獲二名署息縣知縣呂耀輔拿獲十三名新蔡縣知縣書端先後

拿獲三十三名並會督各路兵勇暨署詳符縣事試用知州阮非颺派往眼線丁役在於正新交界拿獲首匪薛大架子一名在於周家口拿獲匪首常小好程玉二名在於臨潁縣南關拿獲匪首朱二大旺一名均經臣檄派候補知府馬永修馳往訊明分別正法懲辦惟韓驢子一名尚未弋獲其餘實屬搜拿淨盡地方肅清民情安帖並據該管鎮道各稟相同臣查此次汝光捻匪事起倉猝立被殲除辦理誠尙妥速其先設非光州知州姚國慶預請練營駐紮提督姜桂題李永芳等迅速戎機稍一俄延致各路糾匪到齊勢必燎原難制其後設非新蔡縣知縣書端曾合搜拿不遺餘力雖保死灰不再復燃此數員勞績尤爲卓著其餘在事文武官紳或身親行陣或拿獲首犯均各奮勇出力核與克復城池斬擒要逆無異合無籲懇 天恩俯准照臣所保獎勵以爲迅速赴功勇於任事者勸實於地方營務兩有裨益得 旨姜桂題李永芳均著交部從優議敘王兆蘭等均著照所請獎勵仍著知照李鶴年飭屬將逸匪韓驢子嚴拿務獲毋任漏網○崇綺奏准刑部咨御史胡隆洵奏請將盜案仍照舊例分別首從辦理一摺恭奉 上諭交部議奏經部議以欲復情有可原舊例莫若將就地正法章程先行停止請 旨飭下各省督撫將軍都統府尹體察地方情形將夥眾持械搶劫案件仍照成例解由該管上司覆勘分別題奏不得先行正法迅速妥議具奏等因奉 旨依議欽此鈔單行文前來查同治八年前任大學士直隸總督曾

國藩奏奉 諭旨將拿獲烏匪土匪擾害鄉里橫行搶劫以及騎馬持械倚強肆掠兇暴聚著者仍照奏
定章程山地方官審訊明確稟明督撫批解該管府州縣親往覆訊後卽行就地正法嗣於十三年御史
鄧慶麟奏軍務肅清省分拿獲盜匪請照例辦理准部議以各省情形不同令各直省體察具奏經前任
都統瑞麟奏准熱河拿獲搶劫盜犯仍照新章辦理俟盜風斂息防兵裁撤卽行規復舊制各在案查此
等盜賊擾害地方一經拿獲訊明若不立加顯戮殊不足以昭炯戒而儆兇頑伏思 國家培養元氣必
以安民爲先而安民之道首推弭盜未有盜賊肆無忌憚良民日不聊生而元氣可望自復者卽如熱河
所屬地方幅輳遼闊山路紛歧地接外藩民無土著其中獷悍不法者實繁有徒加以軍營散勇內地匪
人悉以口外爲逋逃淵藪而壤地毗連之奉天錦義等處及口北道屬之多倫諸衛均爲馬賊出沒之
區每一句連卽行嘯聚焚殺劫掠無惡不爲甚則拒敵官兵實屬目無法紀其破案而駢首就戮者固已
不少而怙惡不悛幸得漏網者所在猶多本年夏間匪首孫振邦等糾集多人盤踞圍場重地搶掠馬匹
賄賂洋鎗狡馮思逞意殊巨洵雖經分撥練軍當時擊散擒斬多名復通飭各屬搜拿逸犯而匪首迄未
就獲前訊據所獲孫振邦夥黨供稱該匪首初至內圍自帶匪徒二十餘人嗣梁二洋鎗及曹振江潘雲
藍等匪各率馬賊十數人或三四十人陸續入夥旬日之間竟聚至百數十人近據各屬聲言起馬賊土

匪類皆糾集多人肆行焚掠殺傷事主擄占婦女之案可見口外盜匪黨與衆多平素習熟成風非盡由飢寒誘誘所致似此蔑法異常縱使立予刑誅猶慮地廣兵單廓清非易倘弗及時懲辦必致燎原滋蔓國威尤難況承德府所屬州縣其距郡有極焉者而沿路警汛又甚稀疏若將應行就地正法重案一律解勘不特中途耗費其事實在意中卽令囹圄嚴羈而聽候部覆之項亦恐別滋變故如往歲朔陽之反獄劫囚豈非股鑿且以懲不畏死之徒倖邀寬緩則從此賊膽益張犯法者衆揆諸辟以止辟之義似亦未符昔子產治鄭用猛孔子且稱爲惠人諸葛治蜀尙嚴後世不皆爲苛政蓋安良必先除暴能惡人乃能愛人也奴才在任二年有餘深悉口外盜賊情形於邊計民生大有關係較之軍務久平民情安謐省分絕不可同日而語相應據實陳明除尋常盜劫之案仍照成案解勘並依刑部續纂則例核辦外至馬賊土匪夥衆持械強劫各案件請仍照奏定章程於覆訊明確後卽行就地正法以杜亂萌一俟盜賊肅清練兵裁撤再行規復舊制並一面督飭地方文武員弁及旗綠各營練軍認真查辦不得妄拿無辜以仰副 朝廷慎重刑章之至意下刑部知之○丁未譚鍾麟奏閏七月初三日沿海颶風暴起洪潮泛溢瀕海各縣田禾被淹已札飭查勘被災輕重加意撫卹得 旨著卽飭屬妥籌撫卹毋任失所○戊申諭本月十七日 孝貞顯皇后梓宮永遠泰安 普祥峪 定東陵在事王大臣均能恪恭將事謹慎無

愍所有恭理喪儀之悼親王奕諱恭親王奕訢貝勒奕劻固倫額駙公景壽大學士寶鋆協辦大學士吏部尚書靈桂禮部尚書總管內務府大臣恩承工部尚書翁同龢均著賞加三級禮工二部內務府堂官均著賞加二級到任未久之署工部侍郎徐卬前管理工部事務予告大學士全慶均著賞加一級禮工二部內務府承辦差務司員均著賞加二級並著恭理王大臣及該堂官查照成案酌量保奏候旨施恩各營派出 蘆殿管營等官太常寺隨從堂司各官恭送 梓宮及行禮之王公文武大小官員侍衛章京等守護 陵寢公榮毓榮頤總兵景瑞均著賞加一級用示推廣仁施至意○諭 孝貞顯皇后梓宮永遠奉安 地宮大禮告成在事大臣敬謹襄辦妥協周詳允宜仰體 慈懷特加恩敘所有隨入地宮之悼親王奕諱恭親王奕訢恩郡王奕祥貝勒奕劻載澂載瀾固倫額駙公景壽大學士寶鋆協辦大學士吏部尚書靈桂尚書恩承翁同龢均著賞加二級○以 孝貞顯皇后梓宮奉移 善祥峪 定東陵永遠奉安加賞 蘆殿管營大臣尚宗瑞等各加一級該營兵丁賞給半月錢糧○以本月十七日 孝貞顯皇后梓宮永遠奉安 善祥峪 定東陵賞工部堂官尚書翁同龢太子少保銜瑞聯等交部議敘○以 孝貞顯皇后梓宮永遠奉安禮成賞辦理差務直隸總督李鴻章及文武大小員弁各加一級沿途當差兵丁賞給一月錢糧○諭本月十七日敬題 孝貞顯皇后神主之大學士寶鋆

李鴻章齋肅潔誠恪恭將事著加恩各賞給帶藤貂褂一件○諭順天府奏京城新建廣仁堂籲懇恩賞米石一摺旗安門內新建廣仁堂收養無依童幼並分助守節婦女常年接濟經費不敷加恩著照所請自本年爲始每年賞給小米三百石以濟貧困○已酉諭 孝貞顯皇后梓宮永逮泰安隨入 地宮之王大臣 經降旨加恩所有工部執事司員郎中素麟著以道員用俟得道員後賞加二品頂戴著補著在任以道員卽選俟選缺後賞加二品銜景澧著開缺以五品京堂候補員外郎益齡著俟升郎中後在任以道員卽選俟選缺後賞加二品銜郎中上行走裕昆著俟服闋簡放道員後遇有應升之缺開列在先郎中曾銖著在任以道員卽選並賞戴花翎沈守廉著在任以道員卽選俟選缺後賞加按察使銜員外郎陳欽銘著在任以本部郎中卽補並賞加二品封典田國俊著俟升郎中後在任以道員卽選賞換花翎程鼎芬著俟升郎中後在任以道員卽選並賞戴花翎承恩著在任以知府卽選並賞加鹽運使銜○庚戌 上出朝陽門步行至 黃幄上香行禮○辛亥升祔 孝貞顯皇后於 太廟○上詣 太廟 奉先殿行禮○壬子以 孝貞顯皇后升祔禮成獎敘 太廟讀祝官瑞祥贊引官迪興儀官克們太唱樂官慶連各紀錄三次獻帛爵宗室章京載勛毓長德錫德岫隆曹隆慧延祺岳康奕根奕斌載品載信載國溥潤銳藝祿紳德琨景恩慶昭聯魁奕光奕煊載努載燕載光文初續忠恩榮琳誠麟定普

榮瑞亮奕堂奕楷奕楠載良載荷溥整誠解盛瑞崇斌誠受阿昌阿札隆阿良詰玉岑斌昌魁庸遵亨惠
雲惠曾錄延慶中端等五十四員各紀錄二次○賞恭送 神牌黃輿回京王公大臣及各旗營派出
護送官員各加一級兵丁等賞給半月錢糧○福銀奏青海地方有附住番眾剛咱等八族昔年原係河
南野番於咸豐間經前辦事大臣奴才福濟收撫投誠奏定條章約以十事安插河北頗能遵守條章革
其野性追同治八九年間逆回倡亂地方文武不遑外顧雖時有互相搶掠之事尚未肆擾地方迨及回
匪蕩平查辦結案該番目等復能將乘亂滋事之番先後綁獻送轅懲辦近數年來尤能約束其眾住牧
相安其生齒日繁若不隨時整頓恐其積久生玩控制為難當於去歲經前護理辦事大臣鄧承偉飭派
委員徧歷該族清查戶口卽以申明定章稽覈鈴束擬示以賞罰以昭懲勸曾經咨商前督臣左宗棠擬
每歲於番貢糧項下酌撥青稞數百石賞給該總管千百戶等資其養贖資以防禦當經左宗棠覆准照
辦只以需撥番糧應由何處提撥尙待查清未及奏請自奴才福銀到任接查辦卷當經咨行西寧道飭
查各屬番糧有無存餘應否提撥去後旋准咨呈此項番糧原係番聖地地額徵向來不入正供只作為
各寺喇嘛衣糧暨防河番眾之用現查所屬四屬暨碾大二縣並無存餘可撥惟西寧縣額徵番糧除
每歲應支喇嘛衣糧外尙餘存番糧青稞一千二百餘石早年每屆冬令卽由此項餘糧內撥放防河番

衆實糧五百石自剛咱八族投誠以後此糧久經停撥自應仍行指提足數撥用等因前來臣等查番族雖屬衆多首在責成番目今剛咱等八族自清查後共計丁口一萬五千八百餘衆向設有總管頭目及千百戶等遞相管束茲當申明定章令其嚴管所屬力堵野番若再示以養贖之恩實以鈐束之任更可期其歷久不渝臣等詳加會議謹照防河實糧五百石之數量爲加增擬總頭目兩名每名每季酌賞青稞二十四石千百戶五名每名每季酌賞青稞一十二石百戶十三名每名每季酌賞青稞八石統計每歲四季共需賞青稞八百四十八石卽照西甯道查覆在西甯縣存餘番實糧一千二百餘石內提撥散放以昭激勵而專責成倘奉行不力卽將賞糧分別裁革示罰似於邊防不無少裨得 旨如所請行○甲寅楊昌濬奏本年六月二十五日甘南各州縣地震經臣查明附片馳奏閏七月十三日遞回原片內開軍機大臣奉 旨知道了著卽督飭地方官將被害災民妥爲撫恤毋任失所欽此當卽飛飭各該印委欽遵辦理在案旋據階州詳報續查該州屬之柳林里永川里石門里角弓鎮等處被震壓斃男女大小四十二名口受傷二十七人倒塌房屋一百二十餘間傷斃牲畜一百餘隻禮縣詳報續查該縣與階州西固接壤之白家莊岳平里大潭等處壓斃男女大小三百四十七名口受傷近百人房屋倒塌不少傷斃牲畜三百餘隻臣接閱之餘竊深憫惻皆由 臣奉職無狀有此災殃無任悚惕隨飭鞏秦階道譚繼洵

將前年賑捐餘糧盡數提撥委員前往會同印委查明戶口迅速賑撫如有不敷卽由原捐項下撥用得旨覽奏階州等處被災情形殊堪憫惻著仍遵前旨妥爲撫恤務使災民均沾實惠○丁巳減江蘇金壇縣被兵減剩應徵漕米十分之一分四○己未以孟冬時享太廟上前期親詣行禮○尙賢奏奉省自添官籌餉以來鹽釐木稅以及山貨雜稅凡關津市鎮無不設權以徵以致物價騰貴民生日感現在急宜休養以培元氣而議者又欲抽煤米之車增烟麻之稅陸路添卡水路加徵蔽骨吸髓無所不至此不過計利之徒藉謀中飽朝廷之所得無幾民間之滋擾良多御史葉蔭昉奏奉省防軍由奉省接濟其言不爲無因但未知各省情形不同奉天地方寒苦家鮮蓄藏民情素稱浮動伏莽至今未淨一遇荒年其患可翹足而待卽以豐收而論斗米不過百餘錢農民售米二石易布一疋隆冬不能盡人著棉窮巷謀生祇以煤米價廉耳若陡然昂貴貧民必立見凍餒奸民或藉勢騷動是急於養兵者恐速於增兵也各直省肅清之後釐稅各卡迭次奉旨裁撤仰見聖懷矜育黎元之至意豈盛京根本重地而任意腹削乎且奏省之餉向來不足未能強爲之者也奴才確有見聞不敢苟安緘默應請飭下戶部將該御史所奏各條卽行罷議以固根本而安閭閻上諭翰林院侍講學士尙賢奏奉省餉絀礙難接濟防軍一摺著戶部歸入御史葉蔭昉前摺一併議奏